

ASO FARAILE, 10 MATI 2023

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofaitulafono.

E faatalofa atu i le paia o le tatou Palemene i lenei taeao fou. Faafetai i le Atua i Lona agalelei faasoia ua mafai ai ona tatou toe fesilafai mo le faaauauina o le tatou galuega. I le afio o lau Afioga i le Sui Palemia, afifio o outou Afioga i Minisita o le Kapeneta, tainane le afifio o Minisita Lagolago.

Ua mamalu mai foi lea tala na atoa i le afio o lau Afioga i le Taitai o le Itu Agai ma le mamalu o sui usufono uma o le Palemene. Malo le usu, malo le soifua manuia ma le lagi e mama. O le aso mulimuli foi lenei o lenei vaiaso, malo le faatoatoa ma le onosai i lo outou mamalu i le feagai ai ma le tatou galuega i lenei vaiaso.

E le toe tau faailoina le toesea ai o le Afioga i le Taitai o le Malo faapea foi nisi o Minisita o le Kapeneta ona o fonotaga faava-o-Malo i atunuu mamao. Ia tatou tatalo pea i le alofa taumulimuli o le Atua e faataunuuina ai faamoemoega uma i le manuia mo se ai o le tapuaiga a le atunuu e ala i fonotaga faava-o-Malo.

E i ai foi nisi o sui usufono ua tatou le mafuta ona o gasegase o le tino ae faapea foi tuatuagia faaleaiga ma Ekalesia, aemaise o maitaupu tau i nai o latou itumalo, tatou talosia i le agalelei o le Atua e sao ma uli ai fuafuaga o feagai ai. Tatou manatua foi i talosaga nai sui usufono o faataotolia i gasegase, na o le mana faamalolo o le Atua e toe faafoisia ai le malosia, o se aso tatou toe feiloai i le manuia.

E faatalofa atu i le paia o le tatou Maota i Ofisa o Pulega o Matagaluega ma Faalapotopotoga Tumaoti a le tatou Malo. E le faagaloina foi le faafofoga tapuai mai o le tatou atunuu. O ou sa ma faiga e tumau lava e oo i le faavavau. Matou faatalofa atu i lenei taeao fou, malo le soifua manuia. Ia tapuai maia ma le manuia.

Na o se toe faamanatu a le Fofoga Fetalai, ua taoto lava a tatou Tulafono Tumau e limataitaiina ai le tatou galuega. O le faagasologa o saunoaga talifuaitau a Afioga i Taitaifono ma Afioga i Minisita, o lo o talifuaitau i mataupu sa laga e sui usufono mamalu i a latou saunoaga. Na o sui usufono

mamalu foi la sa saunoa e mafai ona toe fesiligia se vaega o saunoaga talifuaitau a Taitaifono ma Minisita i se maitaupu na saunoa i ai, pe afai e manaomia e lena sui usufono mamalu se faamaninoga atili. Ia finagalo malilie sui usufono e le i saunoa, e le mafai ona e fesiligia se mataupu ae te le i saunoa i ai. E manaomia lou saunoa i taimi o saunoaga a le tatou Maota ona tapena lelei lea o le Taitaifono ma le Minisita e tali mai i ai. Ua toe faamanino lea vaega, ina ne i toso ai le tatou galuega, ae le o tusa ai foi ma a tatou Tulafono Tumau. O se tasi foi lea o maitaupu sa faamalamalama i le tatou semina i le vaiaso ua tuanai.

O le mea lea ou te faamalulu atu ai i le tatou Maota, ia tatou usitaia pea aiaiga o tatou Tulafono Tumau. Ia agalelei le Alii i le usugafono a le tatou Palemene i lenei taeao.

TUUNA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2022/2023 Nu.172, Tali a le Malo i le P.P.2022/2023 Nu.114, Lipoti a le Komiti o le Vaega Tau le Tamaoaiga i le P.P.2021/2022 Nu.50, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2020/2021.

Ma le faaaloalo lau Afioga.

ILOILOGA O LIPOTI A KOMITI FAA-PALEMENE MA TALI A LE MALO

P.P.2022/2023 NU.21, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU.137, LIPOTI FAALETAUSAGA A LE MATAGALUEGA O TUPE MO LE TAUSAGA FAALETUPE 2019/2020

P.P.2022/2023 NU.82, TALI A LE MALO I LE P.P.2022/2023 NU.21, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU.137, LIPOTI FAALETAUSAGA A LE MATAGALUEGA O TUPE MO LE TAUSAGA FAALETUPE 2019/2020 – ILOILOGA

FOFOGA FETALAI: Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga FALEOMAVAEGA TITIMAEA TAFUA (Taitaifono Komiti o Tupe Maua ma Tupe Totogi): E faatalofa atu i lenei taeao fou i lau Afioga i le Fofoga Fetalai. Ua maea ona e saili ma tu'i le faitotoa o le lagi ia to mai manu aua le tatou faiva i lenei aso. O lea e foi ai le viiga i le Atua. Ae lau Afioga ou te tulai atu e faatu le lafo, *Ina ia faautagia e le Fono Aoa le Lipoti a le Komiti o Tupe Maua ma Tupe Totogi o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mamalu mo Lefaga ma Faleaseela, sui usufono mamalu mo Safata 2 ma le sui usufono mamalu mo Aana Alofi 3.

Na faamaonia le lafo.

FOFOGA FETALAI: Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti. Lau Afioga i le Taitaifono.

Afioga FALEOMAVAEGA TITIMAEA TAFUA: Faafetai. O Sailiiliga a le Komiti ma le Aotelega, o le Lipoti Faaletausaga a le Matagaluega o Tupe 2019/2020 o lo o auiliili ai polokalame sa fuafuaina ma matati'a na ausia e le Matagaluega i le 2019/2020. Na faamauina tupe a le Matagaluega e \$145.1 miliona, o tupe faaalu e \$1.4 miliona. O le Lipoti Faaletausaga 2020/2021 e \$2.1 miliona na faamauina ai. O tupe faaalu e \$115.3 miliona na faamauina i le 2019/2020.

Galuega Faatino ma Matatia Ausia 2019/2020

I iloiloga a le Komiti na faamauina ai le tele o galuega faatino na ausia e le Matagaluega o Tupe.

- Ua faamaeaina le tuufaatasiga o le Lipoti o le Faamatalaga o Tupe a le Malo mo le Tausaga Faaletupe 2019/2020.
- Sa aloaia le faamaonia o lana Tulafono Faatonutonu mo Suetusi o le Lotoifale ia Mati 2020.
- Sa amata faamamaluina ma faalauiloa Fuafuaga Alualu Mamao mo le Vaega Maoti tau Malosiaga i le 2017-2021.
- Maea tapena Taiala mo Maitapu Tau Tupe ma galuega Tau Tausitusi a le Malo.

Itu Taua na Faamauina e le Komiti

- O lenei Lipoti Faaletausaga sa faamauina ai o se tausaga faigata mo le Matagaluega ona o aafiaga tau tamaoaiga aemaise o le Misela i le faaiuga o le 2019. Ona o lea tulaga, na faamalosia ai le tapunia o femalagaaiga mai atunuu i fafo mo le puipuiga o le tatou atunuu, ma na faapea ona aafia ai tulaga tau turisi gasolo mai i le atunuu; o se tasi o atinae o lo o fesoasoani tele i lo tatou tamaoaiga.

I le faia o lenei fuafuaga, sa faamatuu atu ai ni fesoasoani faamama-avega e lua i le aofai e \$66.3 miliona ia Aperila 2020 ma le \$83.3 miliona ia Iuni e lagolago ai vaega nei:

- Faamalosia puipuiga o le atunuu mai le faamai;
 - Fesoasoani i tagatanuu ma pisinisi tumaoti;
 - Fesoasoani mo galuega ma e ua leai ni galuega;
 - Unaia atinae tau meataumafa;
 - Unaia ma lagolagosua i le atinae o le tamaoaiga.
- I le 2019/2020 na faamauina ai le pau maualalo o le tamaoaiga i le 3.5% ia Iuni 2020, pe a faatusatusa i le 3.5% sa siitia ai le tamaoaiga i le tausaga faaletupe 2018/2019.
 - O se fuafuaga a le Matagaluega le faataatia o ni auala e tali atu ai i aafiaga o lo o faaauau pea ona ave ma luitau i le atunuu aemaise o le maualuga o le tau o le soifuaga o lo o i ai nei. E manatu ai le Komiti, e ao ona silasila le Matagaluega i se fetuunaiga talafeagai e siitia ai ana fesoasoani faamama-avega mo le atunuu aemaise o le tuusaunoaina o lafoga i le tau o oloa auina mai fafo mo se vaitaimi e tatau ai.
 - O lo o i ai foi i se tulaga lelei le faasoasoaina o tupe lagolago (Budget Support) mai paaga mai fafo aua le faatinoina o atinae tetele ua malilie itu e lua e ave i ai le faamuamua. O lo o i ai foi le faamoemoe e siitia ai le aofaiga o nei tupe lagolago i le tausaga faaletupe o lumanai.
 - O lo o faaauau pea galuega faatino mo le tali atu i le faamai o le Koviti-19 ma o lo o i ai vaegatupe totoe e \$23.3 miliona ua teuina i teugatupe faapitoa aua le faaauauina o galuega i le isi tausaga faaletupe.

FAUTUAGA:

1. Fautuaina e le Komiti le Matagaluega o Tupe, ina ia faataatia ni fuafuaga talafeagai i le Kapeneta mo auala e faaauau ai le tali atu i luitau o lo o feagai ma le atunuu ona o aafiaga lautele e pei o le tau o le soifuaga. E ao foi ona silasila le Matagaluega i se fetuunaiga talafeagai e siitia ai ana fesoasoani faamama-avega aemaise le tuueseina o lafoga mai le tau o oloa manaomia mo taumafa o aso uma (ft: alaisa, suka, moa, falaoamata, pipi, elegi, mamoe ma isi taumafa manaomia fai soo). O taumafa fai soo o le soifuaga o le tatou atunuu. O le taumafai a le Komiti ina ia faaitiitia le tau o le soifuaga e fesoasoani ai i tagata e vaivai le tamaoaiga.
2. E fautuaina e le Komiti le Matagaluga o Tupe ina ia galulue faatasi ma le Matagaluega o Pisinisi, Alamanuia ma Leipa e faamalositia le mataituina o tau o oloa (price control) e fua i le ogaoga o aafiaga ua feagai ai nei le atunuu, o se faamama-avega foi lea i le atunuu lautele a o feagai ai ma luitau o le faamai.

IUGAFONO:

I le maea ai o iloiloga a le Komiti na faaiugafonoina ai e fautuaina le Fono Aoao Faitulafono, *Ina ia faamaonia le P.P.2020/2021 Nu.137, Lipoti Faaletausaga a le Matagaluega o Tupe 2019/2020.*

Ma le faaaloalo lava.

FOFOGA FETALAI: Malo faafetai i lau Afioga i le Taitaifono, o lea ua faafofoga le paia o le Maota i a outou Sailiiliga aemaise foi o Fautuaga i le tatou Malo. Malo le galulue. Ia, ou te tapa lau Afioga i le Sui Minisita mo le Tali a le tatou Malo.

Afioga Hon LEOTA LAKI LAMOSITELE (Sui Minisita o Tupe): Faafetai tele atu i lau Afioga i le Fofoga Fetalai e tusa ai foi ma le avanoa. E faatalofa atu foi i le paia ma le mamalu o le tatou Maota, faapea foi le tatou atunuu o lo o faalogologo mai i lenei itula o le aso.

Ae ou te tulai atu ma le faaaloalo e tuuina atu Tali a le Malo e tusa ai ma le Lipoti a le Komiti o Tupe Maua ma Tupe Totogi, Lipoti Faaletausaga a le Matagaluega o Tupe mo le Tausaga Faaletupe 2019/2020.

FAUTUAGA 1:

E fautuaina e le Komiti le Matagaluega o Tupe, ina ia faataatia ni fautuaga talafeagai i le Kapeneta mo auala e faaauau ai le tali atu i luitau o lo o feagai ma le atunuu ona o aafiaga lautele e pei o le tau o le soifuaga. E ao foi ona silasila le Matagaluega i se fetuunaiga talafeagai

e siitia ai ana fesoasoani faamama-avega aemaise le tuueseina o lafoga mai le tau o oloa manaomia mo taumafa o aso uma e i ai la le araisa, o le suka, moa, falaoamata, pipi, eleni, mamoe ma isi taumafa faapena. O le taumafai lava o le Komiti ina ia faaitiitia le tau o le soifuaga e fesoasoani ai i tagata e vaivai le tamaoaiga.

TALI:

Ua faamauina ma le faaaloalo fautuaga a le Komiti mamalu ae tu'uina atu mo le silafia le FK(20)20 o le Tala Faatatau Autu o le Tupe 2020/2021 lea na fa'amaonia ai le faaauuina po o le Vaega 2 foi o le Fesoasoani a le Malo e tali ai i aafiaga ona o le Koviti-19.

FAUTUAGA 2:

E fautuaina e le Komiti le Matagaluega o Tupe ina ia galulue fa'atasi ma le Matagaluega o Pisinisi, Alamanuia ma Leipa e faamalosia le mataituina o tau o oloa (price control) e fua i le ogaoga o aafiaga ua feagai ai nei ma le atunuu, o se faamama-avega foi lea i le atunuu lautele a o feagai ai ma luitau o le faamai.

TALI:

Ua fa'amauina ma le fa'aaloalo fautuaga a le Komiti mamalu ae tu'uina atu mo le silafia le Tulafono Faatonutonu – Tapulaa Tau o Oloa Faataa i lalo o le Poloaiga o Fa'alavelave Fa'afuasei Nu.34 lea sa fa'atinoina aua le fa'amamaavega mo tagatanu'u a o maitauina le maualuga o le lamatia o le atunu'u i aafiaga o le Koviti-19.

Ma le faaaloalo.

FOFOGA FETALAI: Malo faafetai i lau afioga i le Sui Minisita o le Matagaluega o Tupe mo le tolaulauina foi o Tali a le tatou Malo. Ia, o lea ua faafofoga le mamalu o le Maota i le Lipoti a le Taitaifono aemaise foi o Tali a le tatou Malo. Ia o le avanoa lenei i sui usufono mamalu o le Palemene mo so outou finagalo ma so outou sao.

Ia, tulai maia lau Afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO (Taitai o le Itu Agai): E faatalofa atu i lau Afioga i le Fofoga Fetalai i lenei foi taeao fou. Ua faamalo le soifua laulelei i lau Afioga, faafetai foi i le faatonufoalauina o le tatou Fonousu i lenei vaiaso o lea ua tatou taunuu mai i le aso faaiu.

Ia, e faapea foi ona faatalofa atu i le eetai mai o le Afioga i le Sui Palemia faapea foi Afioga i Minisita ma Minisita Lagolago, aemaise le Afioga i le Sui Fofoga Fetalai i lena itu.

Ia, liliu mai foi i lenei itu, i le maualuga o lo o eetai atu Afioga i sui usufono, alii ma tamaitai sui usufono o lenei foi itu o le Maota.

E faatalofa atu foi i Ofisa Sili o Pulega o Matagaluega o lo o faatasi mai, faapea foi le tapuaiga a le atunuu o lo o faafogafoga mai i vaega eseese.

E tulai atu ma le faaaloalo lau Afioga i le Fofoga Fetalai o le Maota i nai manatu ia e tusa ai ma lenei Lipoti Faletausaga, Lipoti Faaletausaga a le Matagaluega o Tupe 2019/2020. Sa maitauina e pei ona aumai i le Lipoti sa feagai le atunuu i na foi vaitau ma le faigata o le faamai. E le i faigofie le tulaga sa i ai foi le tamaoaiga ma le taumafaiga mai i le tauasa mai foi i lena vaitau o le misela, e le gata i le misela ae faapea foi le faamai o le Koviti-19. Peitai, o lea sa maitauina sa faafoefoe lelei lava e le tatou Matagaluega o Tupe le tulaga o le faasoasoina o tatou seleni, e pei foi ona faataoto mai i tala o le Lipoti, e 2 fesoasoani po o stimulus packages sa mafai ona faatino i lena vaitau, i vaegatupe e \$66 miliona i le tausaga e 2020 ma le \$83 miliona i le tausaga 2021. Ia e le o ni tupe laiti ia tupe. E momoli atu ai le faamalo ma le faafetai foi i le Matagaluega ma le Pulega i le latou galuega i le faatinoina lelei o a latou galuega.

O le faafesili i lau Afioga i le Taitaifono; o lo o i ai le faaupuga ma le vaegatupe lea i le Lipoti Faaletausaga o Tupe e le i mafai ona faaaogaina, po o unspend funds e \$23,318,092. O le fesili; o se faamalamalama o lea tulaga na tulai mai po o le a se mafuaaga na le mafai ai ona faaoga lea vaegatupe tele i lena vaitaimi? A o lo o tele lava tulaga sa manaomia ai foi le seleni aua isi fuafuaga ma puipuiga o le Koviti-19 ma le faamai e pei ona tatou aafia ai.

Faafetai mo fautuaga a le Komiti. O le Fautuaga 1, malo faafetai o lea e maitau atu o lo o i ai lava le atugaluga o le Komiti i le tulaga o le tau o le soifuaga o lo o i ai i lenei vaitau i le taugata o taumafa, aemaise lava i taumafa, e fai si taugata o tau o taumafa o lo o i ai. Ae faafetai foi i lau Afioga i le Taitaifono i le aumaiga o lea fautuaga taua, aua o le faatuusaunoaina lea o tiute o taumafa manaomia. Ia faafetai e manaia foi le fautuaga e pei ona aumai. Ia o lea foi la ua aumai le Tali a le Malo. O le Tali a le Malo, o lea e tali mai i le aumaiga o stimulus package. O le faamatalaga o le stimulus package, o le tausaga e 2020. O lea la e pei e matau atu o le tou fautuaga mo le taimi nei ma le faigata o lo o feagai ma le atunuu i le taugata o le soifuaga. A o le tali lea e aumai o le stimulus package o le 2020. Ou te le o malamalama la i le tulaga o fesootaiga ia o le 2 i le 3 tausaga talu ai ma le tau o le soifuaga lea e pei na fesiligia e lau Afioga ma le tou Komiti.

E ui i lea, ia silasila ane i ai. Aua sa ou manatu ai e aumai le Tali a le Malo i ni tulaga e tuuitiitia ai le taugata o le soifuaga pei ona fesiligia ma le fautuaga foi na aumai i le Fautuaga 1. Peitai, e eseese mamao mea ia.

O le Fautuaga 2, faafetai. Faafetai foi o lea ua agai le Fautuaga 2 i le lisi o oloa, i le tau o oloa, ia po o le lisi o oloa lea e aumai i le tatou price control.

O lea foi la ua uma ona tatou talanoaina i lenei vaiaso i isi Matagaluega ia o lo o nafa ma le price control, e pei la o le MCIL. Ia o lea foi ua uma ona tatou talanoaina tulaga ia, a o lea ua aumai i i, e sao lelei, e sao lelei le atugaluga o lo o faailoa mai e lau Afioga ma le tou Komiti. O le popolega foi lena i lou sui usufono. O lea ou te vaavaai atu i ai i le siisii pea i luga o le taugata o le tau o le soifuaga o lo o feagai ma i tatou i lenei vaitau. Ia, o lea la e aumai le tali, o le lisi o le tau o oloa o le tausaga 2020. Ia, se i silasila ane lau Afioga po o talafeagai ma fesootai le tau o le lisi o oloa o le 2020 ma lau fesili lea e aumai i le taimi nei.

Ae pei o le tulaga lena, a o le mea sili ona taua lea ou te matau i le Lipoti a lau Afioga ma le fautuaga, e manaomia le galulue faatasi o Matagaluega, Matagaluega o le MCIL, Matagaluega o Tiute ma isi Matagaluega i le tau fofoina o le faafitauli o le taugata o taumafa o lo o feagai ma tatou i le taimi nei. E taua ai le faamaoni, faamaoni o kamupani ma i latou o lo o faatauina mai oloa o lo o faaulufaleina mai i totonu o le atunuu, faamaoni i faamaumauga ia e ave e le MCIL, e faatulaga ai ma faavasega ai e latou le lisi o tau o oloa. Aua a le faamaoni foi, ua le fetau foi ma le faatulagaga o lisi o tau o oloa, ae faapea foi le faamaoni o faleoloa. Ia atonu ua uma ona tatou afea lena tulaga i lenei vaiaso, i le tulaga o le taumafai pea o le Matagaluega e fai a latou asiasiga i faleoloa ina ia mautinoa o lo o usitaia pea le tau o oloa o lo o faatulaga atu e le tatou Matagaluega. Ae faamalo faafetai i ia vaega uma.

Lau Afioga i le Fofoga Fetalai, o le tulaga lena aua e tatau ona tilotilo i faiga foi ia e tau taofiofi ai mea o faatauvaga foi ia e le o lelei e ono tulei tele ai i luga le tau o oloa i lenei vaitau, ae aumai i totonu le tatou Tulafono, ina ia tau taofiofi ai i le tau talafeagai e tatau ona i ai.

Ia lau Afioga i le Fofoga Fetalai, ia na pau ia o nai manatu e tusa ai ma le Lipoti, faafetai i lau Afioga i le Taitaifono.

FOFOGA FETALAI: Malo saunoa i lau Afioga i le Taitai o le Itu Agai. O le tuualalo foi ma le faamanatu, ia atonu o se taimi saunoa le Taitaifono faapea foi se lagolago mai a le Afioga i le Sui Minisita o Tupe. Ia o le avanoa lenei o se tasi o sui usufono mamalu.

Ia, tulai mai lau Afioga i le sui usufono mamalu mai Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): Faafetai i lau Afioga i le Fofoga Fetalai mo le avanoa o lenei foi itumalo o Falelatai ma Samatau e fai ai se sao i le Lipoti matagofie a le Komiti o Tupe Maua ma Tupe Totogi a le tatou Malo ua i luma o le Palemene.

E muamua ona momoli atu le agaga faafetai o lenei foi itumalo i lau Afioga i le Taitaifono ma le mamalu o le Komiti mo le Lipoti maeaea ma le manino pei foi ona tuuina mai fautuaga.

E momoli atu foi le agaga faafetai i lau Afioga i le Minisita e tusa ma tali malamalama a le tatou Malo e uiga i fautuaga a le Taitaifono ma le Komiti e pei ona tuuina mai.

Ou te le faitio i Tali a le Malo ua tuuina mai i fautuaga ia na tuuina atu mo le tuutiitia o le tau o le soifuaga, aua o lea e tali manino lava le Malo i le tausaga faaletupe e pei ona iloiloaina 2019/2020.

A o se manatu e fia tulituliloa ona ua mamao tele i tua le tausaga faaletupe e pei ona talanoaina, a o le a sona aoga i lenei taimi, aua o lea e pei o le main issue lava lea o lea e feagai ma lo tatou atunuu, o le tau o le soifuaga. A o lea e matau atu ia faamamaavega ma le fesoasoani sa fai i lenei vaitaimi, o le tuusaunoa lea o tiute ma lafoga o meaai taumafa, aemaise lava meaai taumafa e pei ona lisiina mai, o lo o faalagolago i ai le mamalu o le atunuu i taimi uma ma aso uma.

O le mea foi lea e avatu ai se fautuaga i le tatou Malo i lenei taimi, aua o lea lava e tuufesili, po o le a se fesoasoani a le Malo e mafai ona fai ina ia tuutiitia ai le tau o le soifuaga i lenei taimi? Pe le alagataua ona silasila le Malo e tuusaunoa tiute ma lafoga o meaai ia, e le o meaai uma, a o meaai taumafa o lo o faalagolago i ai le mamalu o le atunuu i aso uma ma taimi uma.

Faafetai i le Malo ua maua foi i nisi o a outou polokalame ma faatalatalanoaga i luga o le TV, o lea ua faaitiitia le tau o uafu, ua molimauina ai le tele o vaa turisi ua mafai ona afea si o tatou atunuu. A o le tuualalo a lenei itumalo, se i silasila le Malo i le tulaga o totogi o uafu i oloa ia e aumai i totonu. Ae tataua foi ona tulituliloa pe afai ae maua se faamamaavega i le tau o uafu, ina ia mafai ona tulituliloa e le Malo, ia mafai ona pass on le cost lenei i le mamalu o le atunuu. Aua e i ai foi taimi e tiga ona tuu i lalo e le Malo le tau o uafu ma vaega uma o lo o contribute i le tau o le soifuaga, ae a le faamaoni foi le aufaipisinisi ia, e le mafai ona maua e o tatou tagata se faamamaavega.

Ae pei o le isi lenei tuualalo i lo tatou Malo, o lea e maua faamatalaga e faitau fia miliona tupe mama po o tupe faasili o lo o maua e le tatou Faalapotopotoga o uafu ma taulaga, ae pe le o se fesoasoani lea e mafai ona fai i lenei taimi, a o feagai lo tatou atunuu ma tulaga faigata o le tau o le soifuaga, ia tau tuutuu i lalo le tau o uafu, ina ia mafai ona maua ai se faamamaavega mo le tau o le soifuaga i mea taumafa i le mamalu o le tatou atunuu.

O se fautuaga puupuu lea e taua atu i lau afioga i le Fofoga Fetalai ae ia manuia tele le tatou Fonotaga i lenei aso.

FOFOGA FETALAI: Malo saunoa i le sui usufono mamalu. Ia na o se fautuaga a le Nofoa, ona o lipoti nei o lipoti o tausaga ua mavae. Ae manaia lava le saunoaga a le Taitai o le Itu Agai, e pei e ave faafautuaga foi lea, pe afai o lo o i ai. A o nei tali, o tali a le Malo, ona o lipoti o tausaga ua mavae. Ina ne i malosi mai tatou lauga i le taimi lenei, a o tatou lipoti ia tatou te talanoaina, o lipoti o tausaga ua mavae. O lo o nofo tapenapena foi le Kapeneta latou, aua fuafuaga mo lenei taimi. Ae ne i te i ua matele a tatou lauga i le taimi lenei, a o lipoti ia o lipoti ua tuanai i tausaga ua mavae, ia malamalama ai lo tatou Maota.

Se i tulai mai lava lau afioga i le Minisita o Galuega.

Tofa Hon Olo Fiti Afoa Vaai (Matagaluega o Galuega, Felauaiga ma Atinae Esecese): Faafetai i lau afioga i le Fofoga Fetalai mo le faasao atili. O lipoti ia, o lipoti a le la itu a o tulai mai i le foe. Ma e le tatau la ona tele mai ni fesili, aua o latou faaiuga ma latou galuega ia, o lea ua toe fesili agai mai i ai. Ma le faaaloalo.

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai, o le mea e fia faasao...

FOFOGA FETALAI: Tulai mai lau afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Ma le agaga faaaloalo, o lea e fesili atu o lipoti a le afioga i le Taitaifono ma le latou Komiti, e aumai ai fautuaga, lea e mafua ai ona matou fesili, e pei o le faasaoga lea lau afioga.

FOFOGA FETALAI: E moni lava o le Taitaifono lea e i ai i le taimi lenei, a o galuega o tausaga ua mavae. Ae atonu e aoga foi le faatupu manatu a sui usufono mamalu foi, ina ia tau silasila foi i ai, ma tau faapaleni mai mo lenei taimi, a o le auga lava ma le atoatoa o lipoti o tausaga ua mavae.

FOFOGA FETALAI: Ia se i tulai mai lau Afioaga i le Taitaifono. Onosai mai lava lau Afioaga i le Taitaifono se i tulai mai le Afioaga i le Minisita o Galuega Tetele.

Tofa Hon Olo Fiti Afoa Vaai: Ioe lau afioga o lea e tau toai atu la matou itu i lipoti a le vaega lea sa fai mai i le fia sefulu tausaga, aua o aga lava ia sa fai i lena vaitaimi. O lea lava ua matou oo mai i i e tatau le tatou Malo, o lea lava e fai le mea lea, o le delay mai i totonu lipoti ia faaletausaga ma tulaga faapena. O lea la e taumafai atu le tatou Faigamalo i le taimi lenei, ia alu lava, o le tausaga lenei ae talanoaina i le isi tausaga. A ou te vaai atu lau

afioga i le Fofoga Fetalai e pei lava o la e le i tea le faasuaava o le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e leai e faamauina ua leva ou te le i toe tagofia lea mea o le ava, ua ou musu ai ua ou le toe fiafia i ai. Na gata lava i aso la o ma tafafa ma Olo.

Lau Afioga i le Fofoga Fetalai, leai o le mea lea e fia faasao, o le lipoti a le Komiti Tumau Faa-Palemene, o tali foi ia e aumai, o tali a le afioga i le Minisita lea e afio mai ma nofo mai. O lea la e agai a matou lauga ma tali agai i lipoti ma tali a le afioga i Minisita. E leai lava la se mea e faapea o faaletonu ai le matou foi taumafai atu. A o le mea lea e lelei ai o lea foi e maitau atu le lava tapena o le Komiti ma le afioga i le Minisita, o lea e tali mai i lipoti latou te le i faia. Ia ma le faaaloalo.

FOFOGA FETALAI: Se i tulai mai lau Afioga i le sui o le Komiti, lau afioga Aliimalemanu.

Afioga ALIIMALEMANU MOTI MOMOEMAUSU ALOFA TUUAU: Faafetai i lau afioga i le Fofoga Fetalai mo le avanoa. E faatalofa atu foi i lenei taeao matagofie. Ae ua ou tulai lava o le mea e fia faasao i le saunoaga a si ou tuagane lea, le afioga i le Minisita ua faapea mai e tele lipoti e behind, leaga o lea e faalogologo CEOs o Matagaluega. Ona o matou lea sa feagai ma le tulituliina o lipoti. E oo mai i le Paeaiga lea na tea nei, ua up to date uma lipoti ma audit. A outou tagai foi i le taimi lea na aumai ai i totonu le lipoti lea a le Matagaluega o Tupe, na aumai i le 2021 i le amataga. Ae leaga o le taimi lea sa fai ai le tatou vavao i le tatou faiga palota ma delay uma atu ai. Ae o lea ou te iloaina, up to date uma lipoti ma audit a nai Matagaluega ma Faalapotopotoga. Ma le faaaloalo lava faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e puupuu lava si matapu lea na sosolo atu lava i le saunoaga a le sui faatoa uma atu.

FOFOGA FETALAI: Tulai mai lau afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: O lipoti ia o lipoti na aumai i le Maota i le Paeaiga na tea nei ae le i talanoaina, ona e le i aumaia i luma o le Maota. O lea la faatoa maua le avanoa e aumai ai i luma o le Maota. Ae sa tatau ona pasia uma atu lava ma avatu uma ai faatasi ma isi lipoti i lenei Paeaiga. Ma le faaaloalo.

FOFOGA FETALAI: Se i tulai mai le sui usufono mo Faleata 4.

Tofa Ale Vena Ale (Faleata 4): Faafetai i lau afioga i le Fofoga Fetalai mo le avanoa. F faafetai foi i lenei taeao i le tatalo e tuuina atu ai i luma o le Atua le tatou Fonotaga i lenei taeao, na taitaina i tatou e lau afioga. Ia afifio foi le paia i le Palemene i lenei taeao ma le tapuaiga a lo tatou atunuu.

Ae ua ou tulai atu i le mataupu lea i lipoti, [.....]. O lea la ua... faafetai atu lava i le tatou Palemene ma le faatautaiga a lau afioga i le Fofoga Fetalai o lea ua... [.....]. Ae faafetai atu e tusa ai ma le... Ae faafetai i lau afioga.

FOFOGA FETALAI: E faamalulu atu i le sui usufono, ne i fesetai...

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai...

FOFOGA FETALAI: Se i onosai mai lava le sui usufono mo Anoamaa 1 se i fai atu se tala a le Nofoa. Ia ua avea foi le taumafai atu o le Nofoa ina ia faasagatonu a tatou saunoaga ma tatou lauga i totonu o le Palemene, ma mea foi o le a lagalaga ai outou finagalo. O le agaga mama lava ia o le Nofoa na avatu ai se tala, ina ia tau agai pea a tatou saunoaga i tausaga e pei ona tuuina mai. E moni lava o le taimi na aumai ai i totonu o le Palemene, ae o le taimi na faatino ai, la e manino tausaga ia e aumai ai i totonu o tatou lipoti. Po o a lava foi sailiiliga a le Komiti ma le Malo ua i ai nei, ia o lo o aumaia lava faamatalaga o tausaga ia e taua i tatou lipoti. O le mea lea, ia malamalama lelei le tatou Maota, ae aua le avea ma se mea foi o le a soona siisii ai lo tatou Maota, ma tatou oo ai i isi tulaga.

Ae faamalulu atu i le sui usufono mo Faleata 4, ia e leai o lea lava e sagatonu le tatou galuega, aemaise foi o le faatinoina i lenei taimi. E pau lava le suiga lea ua i ai, o lea ua toe tolaulau lelei Iugafono ma Sailiiliga ia ma Tali a le Malo. E pau lava lea o se faaopoopoga, ae o mea uma lava ia sa sau ai le tatou Palemene i futia foi ua tuana'i.

Tofa Ale Vena Ale: Ia ou te faamalulu atu i lau afioga, afai foi o le a se lafoga ua paopapa, ia o le agaga lava ia ona o lea ua tatou talanoa i mataupu tau lipoti, o le matafaioi lena a... ae faafetai atu i lau afioga, talia ma le faafetai.

FOFOGA FETALAI: Ia maua pea le toamalie o le tatou Maota. E leai foi se mea ua faoa i le ta i outou finagalo, e leai o lea ua outou malamalama

i le agaga o le Nofoa e tusa o tatou lipoti. Se i tulai mai le sui usufono o Anoamaa 1.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1): Faafetai i lau afioga, o lea ua 3 aso o le tatou Fono o tatou talanoa lava i lipoti nei 2019/2020, 2020/2021, ae saunoa mai i tulaga ia i saunoaga i le tele o mea ia e taumafai atu ai. E leai o lipoti nei, annual reports, leaga o lea e taua e le sui usufono lea e faapea e 2 tausaga e... e leai sa aumai lava i tausaga uma. E pau le mea lea e le i iloiloia i aso ia ua mavae, o lipoti ia a le Komiti, ae sa fai lava galuega a le Komiti ma tofu sui usufono o le Palemene ma lana lipoti lea e alu ia e sikaki i lona fale ma faa... O le faasaoga lena ma le agaga faaaloalo.

Ae o le tulaga i lipoti ia, o lea ua 3 lava aso, e na o le 2019/2020 lea tatou te talanoa ai, tatou te le i oo mai le 2020/2021, leaga o lea faatoa faagasolo galuega a Komiti. Ma le faaaloalo.

FOFOGA FETALAI: Ia malo faafetai, atonu o lea foi ua faaali mai foi le finagalo o le Igoamatua ia Ale, atonu o lea foi ua lagona mai e le sui usufono mamalu le tulaga o lea tatou te i ai.

Ia se i tulai mai le Minisita mo le Soifua Maloloina.

Afioga Hon Valasi Luapitofanua Togamaga Tafito Selesele (Minisita mo le Soifua Maloloina): E le o se mea tele le... e pau lava le mea ua faalogologo atu e pei ua vavao i lipoti. Ae o le mea sili ona ou faafetai i lau afioga, e pei o se mea fou i le Palemene lenei le auiliili lelei o lipoti. O le auiliili foi lea o lipoti ua lagalaga ai finagalo o sui usufono ae moni lava le sui usufono o Anoamaa. Talu foi ona ta i ai i ia vaitau, sa matua auiliilili lipoti, a o i foi e matua fire ai le lauga a le Itu Agai. A o lea ua maitau i le vaitau lenei, se e momoli le faafetai i lau afioga o lea faatoa maua. Aua e na ona tufa lava o lipoti ae le faitauina e le isi sui usufono le lipoti. Ae o lea faatoa manino lava i i le... Faafetai i lau afioga.

FOFOGA FETALAI: Malo faafetai. Ia viia le Atua, o le a foi se mea ua tatou taumafai i ai ia lelei, ia viia le Atua. E le viia le tagata, a ia viia le Atua i mea ua tatou faia mo le manuia o le atunuu ma le Maota. Ia faafetai.

Se i tulai mai le sui usufono mo Falelatai ma Samatau.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai, e tau lagona foi le faanoanoa i le taumafai e avatu fautuaga ae ese foi le mea e tatau i ai le tatou Fono. Ua ou tulai atu ma le agaga faaaloalo, *E faatu se lafo e aveese saunoaga a le sui usufono lea o*

Faleata 4, leaga e le logolelei i le faafogafoga a le atunuu, ma e le faamaonia foi, o lea e aumai lava lipoti i totonu o le Maota lenei.

Ma le agaga faaaloalo.

Tofa Ale Vena Ale: Lau afioga i le Fofoga Fetalai, faamolemole pe maua se avanoa...

FOFOGA FETALAI: Ia malie le sui usufono mamalu, leaga a tatou toe agai loa i tua, ua toso le tatou mataupu. Ia te au foi ia ma le faatu mai a le sui usufono mamalu... E i ai se isi e faaluaina? Ia o lea ua faaluaina.

Faaluaina e sui usufono o le Palemene.

Na faamaonia le lafo.

Upu na faatonuina e le Fofoga Fetalai e aveese mai faamaumauga o le Saunoaga a le sui usufono mo Faleata 4: “[Aua o lea ua maua e lou nei sui usufono, i Paeaiga lava ia e lua lea na tea atu nei, e leai ma se lipoti o lipoti nei na table i le Palemene lenei. Aua o lipoti nei, o lipoti e tatau ona aumai i luma o le Palemene ma talanoaina e leaga o tupe nei e faaaoga e Matagaluega nei, o tupe a le atunuu. O lea foi e fesiligia e Komiti ma ia i ai le silasila a le Maota lenei aua o tatou o sui o le atunuu, o tatou lea e vaai tino i mea ia e faaaoga ai tupe nei, po o faapefea ona faaaoga. A o lea la e maua atu, e lua Paeaiga lea na tea atu nei, e le i aumaia lipoti nei.]”

FOFOGA FETALAI: O mea lava e faapena, o Taitai o le atunuu tatou, tatou te fetuutuunai i le mea e maua ai le filemu ma le toamalie o le Maota, aemaise o le faafogafoga mai o le atunuu. O le mea lea, o a foi ni futia ua tuanai, ia faatea ia mea, ae faaauau le tatou galuega.

Ia tulai mai le sui usufono mamalu mai Satupaitea.

Afioga Hon LAUTAFI FIO SELAFI PURCELL (Satupaitea): Faafetai atu i lau afioga i le Fofoga Fetalai mo le avanoa i lenei foi taeao. E pei ona e saunoa o tatou o taitai o le atunuu e tatau ona iloa le taimi e malu ai, ma le taimi foi e sousou ai. O a manatu ua faaalua, ou te lagona e gata lava i totonu o le Maota lenei. O lo o faafogafoga le atunuu, afai e solomua ia i tatou ona tatou iloa le faafoeina o mea nei o manatu e le talafeagai, e faapena ona manuia le atunuu, o lea o lo o faataitai mai ia i tatou. Ae faamalo i lenei taeao, o a foi ni manatu, ia faagata ai lea i i.

Ae o le manatu o Satupaitea ia, leai e moni, e moni lava i tatou lipoti ia, ae lagona o le 2019 lava lea e gata ai le alu i tua. O isi o lipoti a nai isi Matagaluega ia sa tatou talanoaina. Ae ua ou tulai atu, e alu sao lava i le 2019/2020. E pei lava o lea e atagia mai ma e manino mai lava i i i le lipoti lenei, e faamauina ai o se tausaga faigata mo le Matagaluega ona o aafiaga tau tamaoiga, aemaise le misela sosoo mai ai ma le Koviti-19.

E fia momoli atu ai lau faafetai i le Matagaluega o Tupe mai lena foi vaitaimi. Ou te lagona o le toatele lava o i latou o lea sa faigaluega i lea taimi o lea lava e tumau i totonu o le Matagaluega lenei. I le tulai mai o faafitauli nei lau afioga i le Fofoga Fetalai, e fou foi le lagona, aua o le taimi lea o la ou te le i le Kapeneta, ina ua tulai mai le faafitauli o le Koviti-19. Pe faapefea e le tatou Malo i lona tamaoiga laitiiti, aua e le i iloa e se isi po o a auga o lenei faamai ua tau mai ua aafia le lalolagi. Ia o i na tatou tapa i ai, le Matagaluega lea o Tupe, se i aumai se tou fesoasoani, aumai se tou tali. Ia o le tali lea a le Matagaluega o Tupe, e le i faapea lava na fai mai le Matagaluega o Tupe, ua leai se tatou tupe e fai ai ni mea ia e tatou te le i fuafuaina. E 2 stimulus package ia e \$150 miliona le aofai i le 2019/2020 na maua mai ai tupe, e ui lava ina utiuti le tatou faasoa. Ma o tupe faaalu e le i iloa e tatou e tupu mai se faamai. A o lea lava na tulai mai le Matagaluega o Tupe tuu mai le \$150 miliona, lea e i ai le lisi umi lena i mea na faaalu ai. E leai lava se vaega o le atunuu, e le i oo i ai se fesoasoani i le vaegatupe lea.

O le mea lea e momoli atu ai lava lau faafetai i le Matagaluega lea i le tulai mai ma le fesoasoani malosi i le tatou atunuu ina ua tulai mai faafitauli. O lea foi i Tali a le Malo, ia o tulaga na i na taimi. E pau lava le mea, o le fautuaga a lou sui usufono, ia po o faaauau mai ia tulaga ia e tau mai lenei taimi, atonu e aumai lipoti o le 2021/2022, ona tilotilo lea i ai, po o faaauau tulaga sa tulai mai ai i na taimi po o ua sui foi, aua ua ese foi o lea ua 3 tausaga.

O le vaega lea o le tau o oloa, ia o se tuualalo foi e pei foi ona sa paia e nisi sui, o mea foi nei o faioloa e taumafai lava latou i auala uma e maua ai a latou polofiti, e maua ai tupe maua. Ae o le faigata la, ona e sii i luga e latou tau o oloa. Ae sa i ai foi fuafuaga a le Malo ia, e taumafai e fai le mea lea o le faatauvaga aua a tauva loa, o lona uiga e faapau lava i lalo tau, aepeitai na tulai mai loa le Koviti-19, faataatiaese loa e le aufaioloa lena mea o le tauva. Ae faafetai o lea la na toe faatu ai le price control.

O le faafesili foi a lenei sui usufono, i le taimi lea o le 2020 lea e i ai le Tali a le Malo lea i le price list lea, po o toe faaauau ona o lea tatou te iloa ua sii foi le tau o le soifuaga mai le taimi lea na fai ai le order lea, le price list lea i le taimi nei. O lona uiga ua tatau ona silasila le Faigamalo pe ua tatau ona toe fai se isi tau o oloa e faaitiitia ai le tau o oloa aua o lea ua taugata le tau o le soifuaga i lenei taimi. Ia o le faafesili lena. Ae o le agaga lava ia o le tulai atu o le faafetai i le Matagaluega o Tupe i le lipoti, faafetai foi i le

Komiti mo le latou lipoti auiliili faapea foi Tali a le Malo e ui ina lua tausaga, ae o la lava e aoga i le taimi lenei. Ma le faaaloalo lava.

FOFOGA FETALAI: Malo faafetai mo le sao o Satupaitea. O lea ua maua mai e le sui usufono mamalu mo Satupaitea le agaga o le Nofoa. Ia ave lava faafesili faapena i o i le tatou Malo, po o faaauau e oo mai i lenei taimi. Ae malo faafetai.

Tulai mai le sui usufono mo Aleipata Itupa i Luga.

Afioga FUAAVA SULUIMALO AMATAGA (Aleipata Itupa i Luga): Faafetai i lau Afioga i le Fofoga Fetalai mo le avanoa i lenei usugafono e fai atu ai se manatu, e tusa ai foi ma le lipoti a le Komiti o Tupe Maua ma Tupe Totogi, a lo tatou Malo. O le taeao foi lenei e faafeiloai aloaia atu ai i lau afioga i le Fofoga Fetalai, aemaise foi o le Faigamalo i le afioga i le Sui Palemia ma vasega a le Kapeneta i alii ma tamaitai, aemaise foi Minisita Lagolago.

Ia i lenei Itu i le matou Taitai aemaise foi o le mamalu o sui usufono o le Maota, faapea foi Ofisa Sili o Pulega o Taitai o Matagaluega ma Faalapotopotoga.

O lenei taeao i le faafofoga a le atunuu aemaise foi o si ou itumalo, e le tele se manatu agai i le lipoti. O lea foi ua saunoa manino lau afioga i le Fofoga Fetalai, ona o le tautuupega o tausaga o lo o talanoaina. O le tulaga lea i le 2020, ae ona o se manatu e avatu foi lele e fatufatu i ai lenei foi vaitau i le tatou Faigamalo, ma le tatou malaga o lo o agai i lenei vaitaimi. O le vaavaai atu i le lipoti o lea foi e agai mai tali a le Faigamalo, e agai lava i taimi foi sa fai ai ia fesoasoani ia a le Faigamalo talu ai. O lea e i ai le 1, 2, lea ua faasolo i le vaega 3, ae pei o le uiga o le faamatalaga, e avatu ai le agaga faafetai foi i le Komiti, e tauala atu i le Taitaifono ma lau afioga i le Fofoga Fetalai, ona o le tapenaina o le lipoti.

O lea foi ua aumai tali a le Malo, e agai tonu lava i fesoasoani ia sa fai i lenei vaitaimi. O le agaga faafetai foi la i lenei vaitaimi sa fai mai ai fuafuaga ia. O lea e pei lava o le \$83 miliona lea sa faaoga i le 2020 ma le \$60+ miliona, o lona uiga e total, o se mea o le \$150 miliona le fesoasoani a le Malo, ia sa taumafai e faaitiitia ai le tulaga o le pagatia sa feagai ma faamai i le vaitau tonu lea o tausaga o lo o i ai lipoti.

Ae o le manatu ua tulai mai, o lo o aumai i totonu o le lipoti tulaga foi ia e pei o le tatou Regulations po o Tulafono Faatonutonu. O lea e vaai atu e po o se mea o le 6 masina lea na fai ai le isi Tulafono Faatonutonu, e control ai prices foi ia o oloa, aemaise oloa ia e lisi mai i i, o oloa ia e manaomia. E le gata ina faatonutonu ai ia wholesale po o le vaega lea o oloa siatoa, ae faapena foi retail lea e i le vaega lea o faleoloa faatau taitasi.

I se faafautuaga la a lenei itumalo, e pei o se mea foi lea e fesoasoani foi i lenei vaitau ua feagai lo tatou atunuu ma le taugata o le soifuaga. Pe le silasila le tatou Faigamalo i tulaga ia. Aua o lea e māua foi i nisi o Tali a lo tatou Malo, e leai se tatou mea e mafai, ona o tau lava e aumai i fafo i atunuu po o kamupani e ona oloa. Ae pei o se tulaga foi lea, o lea e i ai vaega ia o vaegatupe a lo tatou Malo lea e mafai ona fesoasoani e fai ai stimulus package e fesoasoani i le tau o oloa. E tai pei foi la ona i ai vaega ia i tausaga ua tuanai, i taimi foi o pepesi le faamai ma vevela, sa feagai ai le tatou Malo i aafiaga foi i lena vaitaimi ona fai ai lea o Tulafono Faatonutonu ia, e fesoasoani lea i le tau tuutuu i lalo o le tau o oloa ma tulaga uma faapena, aua le fofoga taumafa o si o tatou atunuu.,

O lea e i ai le kopi lea o le Tulafono Faatonutonu lea e aumai i i ia Tesema o le 2020, ae ua faaleaogaina ai le isi Tulafono Faatonutonu lea ia Iuni o le 2020. O lona uiga a matau i le vaitaimi lea, o lona uiga e tai 6 lava masina ma fai nisi Tulafono Faatonutonu e tau controa ai oloa siiatua aemaise foi o faleoloa o lo o faataua oloa ma meaai taumafa mo si o tatou atunuu.

E pei o nai tulaga ia e avatu faafautuaga ai se tasi lea o vaega, ae faafetai lava mo le lipoti ma tulaga uma ua faapea ona taatia mai i lumamea nei. Ma le agaga faaaloalo, faafetai.

FOFOGA FETALAI: Ia malo faafetai. Ia se i tulai mai le sui usufono mo Gagaifomauga 1.

Tofa Hon FAIMALOTOA KIKA IEMAIMA STOWERS-AH KAU (Gagaifomauga 1): E faafetai lava i lau afioga i le Fofoga Fetalai mo le avanoa. E faatalofa aloaia atu ai foi i lenei taeao i lau afioga, aemaise foi lau afioga i le Sui Palemia ma le Aiga Minisita, le saofaiga a Minisita Lagolago faapena foi lenei Itu i si o matou Taitai ma sui usufono mamalu uma o le Palemene o le Maota i lenei taeao.

E faatalofa atu foi i le tapuaiga a Ofisa Sili o Pulega o Matagaluega ma Faalapotopotoga Tumaoti a lo tatou Malo o lo o tua i ai lo tatou Malo i so o se taimi i feau ma galuega aua le atinae o si o tatou atunuu ma ona tagata. E le tele foi, o lena ua tele ina faailoa e le matou Taitai faapea foi nisi o sui usufono nisi foi o tulaga e pei ona... ae fia faamauina le agaga faafetai.

E momoli le agaga faafetai i lau afioga i le Taitaifono ma le Komiti mamalu mo le lipoti. E le gata i lea o le faafetai i le afioga i le Minisita mo Tali a le Malo, e tusa ai o sailiiliga a le Komiti. E ui lava foi ina faapea mai i se taimi ua fano se tasi o... sa le tataua ona avatu ni... tele atu ni a matou fesili, ona o mea sa fai foi i le matou taimi. E pei o le tulaga lena e augata ai, aua o lea matou te malamalama i mea sa tutupu foi i lena taimi. E momoli ai le agaga e aupito sili ona faafetai i le Matagaluega o Tupe i le lipoti lea faaletausaga 2019/2020, ona o le tele o le fesoasoani na tali mai ai le Ofisa o Tupe e pei

lava ona faamauina, o se tausaga e aupito i sili ona faigata i le Matagaluega. Ae pei ona silafia e le gata o le 2019 i le oso mai o le faamai o le misela a o tau faaiuu galuega mo togafitiga o le misela, ae toe patu mai le tatou Koviti-19, o lea na tele lava le fesoasoani na manaomia. So ia au lava ia, na ou faapea ai e tele mai ni fesili a lena Itu e fia malamalama i mea o lea e lipoti mai, ona o lea sa matou i ai i le taimi lena. O le ala lena o le leai o ni matou tulai soo atu ona o lea matou te malamalama i tulaga e pei ona lipoti mai.

Ma o le faafetai lena a lenei sui usufono e tusa ai o le lipoti lenei. Ona la e pei foi ona saunoa se tasi o sui usufono i le faatusatusa mai i le taimi nei. Ua na o se fautuaga lava a le matou itumalo e fia tuuina atu, o matou i Savaii e tagiua ma faanoanoa le fatu. Ae mo le tatou lipoti lea i le price control board, i le lisi o tau o oloa pe ua toe iloilo pe o lea na gata mai lava i lena taimi, ona o matou i Savaii, e tele mea o le mamao o le va o faleoloa mai le isi ae manaia ia pe a tuu, faapipii i luma o le faitotoa mea nei aua ta te fiu e... fai mai o la e taugofie i le fale... ia e toe laa, aemaise o tagata e leai ni taavale, e sue le faleoloa...

FOFOGA FETALAI: Ua ou vaelupeina le saunoaga a le sui usufono mamalu, o lea ua taunuu mai i le tatou taimi malolo, ona e silafia foi o le aso lenei o le aso puupuu, e afa aso tatou i le aso lenei. E fua foi i ai a tatou saunoaga, aua o le tele lava o mataupu o lea ua laga mai e nisi o sui usufono.

Ae ua i ai le manatu, o le a faataatiaese Galuega a le Fono Aoa mo le malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:33 i le taeao ma toe amatalia i le itula e 11:00 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono. Faamalo le onosai i le tatou Maota. E i ai le manatu ua maea paleauu le taligasua a le tatou Maota. Faafetai i le Atua i lana foai, ua maua foi se faasiliga malosi e faamaea ai la tatou galuega o lenei aso.

E faataatiaese le tatou taulumaga mo le malologa o le taeao o lo o saunoa le sui usufono mo Gagaifomauga 1. Ou te tapa lau Afioga i le sui usufono mamalu mo le faaauuina o lau saunoaga.

Tofa Hon FAIMALOTOA KIKA IEMAIMA STOWERS-AH KAU: Faafetai i lau Afioga i le Taitaifono, ma e momoli atu muamua le faafetai i lau Afioga faapea foi le Ofisa o le Fono e tusa ai foi o le faamalositino ua

maua ai le malosi o le Maota mo le faaauauina o a tatou galuega. Ia e le toe umi aua e le i i ai sou manatu ou te tu i luga, o le fia faamauina o la'u faafetai i le Komiti o le Afioga i le Minisita i Tali a le Malo, aemaise lava la'u faafetai faapitoa i le Ofisa o Tupe i le tulaga e pei ona faataatia mai ai le Lipoti lena o le 2019/2020, aemaise o fesoasoani sa tali mai ai le Ofisa o le Tupe i le taimi na matua pagatia ai le atunuu i le Misela ma le Koviti. E leai ni tatou tupe leai ni tatou tagata mai fafo ma mea uma lava, ae o le mea na ou fia faamamafaina i le Ofisa o Tupe i le Tupe lenei e \$66.3 miliona, \$88.3 miliona, i le matou matau i lena taimi i le faasoa na i ai na laugatasia uma tagata o le atunuu i le tupe lea e ova ma le \$150 miliona. So o se tasi foi la lena o mea foi lea na ou faapea ai po o le a se fesoasoani a le Malo i lenei taimi e avatu faafautuaga ina ia faapena. Ona o lea foi pei e matau pei ua ave foi lea i Faalapotopotoga, o vaega i pisinisi ma na... a o lea sa fesoasoani malosi mai le puipuiga o faamai a. O mea nei lea e aumai i le lipoti sa fesoasoani malosi i tagatanuu uma ma pisinisi tumaoti sa fesoasoani mo galuega ma e ua leai i galuega le uunaia o atinae tau meataumafa i lena taimi sa fau le meaai, uunaia ma lagolagosua i le atinaeina o le tamaoaiga. So o lau faafetai lea na ou tu atu ma le ona lea na fai mai... sa le tatau ona avatu ni matou manatu aua o le matou taimi lea, a o si ou vaivaiga Olo, faapea a au ia o le a tele mai ona tulai mai lena itu e fesili mai ona matou fesoasoani lea i le lipoti a le Taitaifono aua o lea sa matou i ai i lena taimi. O le ala foi lena e augata ai e tulai soo atu leaga o lea matou te malamalama i mea na tutupu i le matou taimi. E faamalulu atu ai i te i foi ae na o matou a lea tulai atu ae le fesili mai pe i ai se fesoasoani. Ia, ua uma le tala a Gagaifomauga ae o lata talosaga, o matou mai Savaii ua matua mafatia lava i le taugata o le soifuaga. Na ona avatu faafautuaga e ala i tatou mea ia e ui ina o le Lipoti 2019/2020 ae mo le isi sikepu e ono silasila i ai le Malo ua matua taugata tele pe le o i ai se isi tupe i le Matagluega o Tupe se i fai ai se isi togafiti se i tau faapau i lalo aemaise foi le mea lea ua aumai i le Lipoti i le tuusaunoaina aemaise o taumafa o aso fai soo pe mafai ona tuutuu laitiiti i lalo. O fautuaga e avatu mo le taimi nei ae le o le lipoti, ma le isi pe mata pe afai e le i toe iloilo le lipoti tuai lea na i ai, faamolemole e faapiii i luma o faleoloa ia o ta aluatu tutusa le tau lea ma le faleoloa lea na o ta alu muamua i ai la e tutusa tau. A o le mea lea ua i ai nei ua matua sii a le tau o le faleoloa latou.

Ia, ona faamaea atu ai lea o se faamatalaga lau Afioga i le Taitaifono mo le tatou fonotaga i lenei itula. Manuia le tatou Fono manuia le Maota.

FOFOGA FETALAI: Malo faafetai. Se i tulai mai lau Afioga i le Minisita o Galuega Tetele.

Tofa Hon Olo Fiti Afoa Vaai: Faafetai tele lava o lea lava sa tuu atu lava le avanoa e sausaunoa le Tamaitai Matua o le Maota i le tulaga lea e pei ona

saunoa i ai. Ae ua mafua foi ona matou le fesili ona o lea ua matou nonofo atu i i ae ua matou mumusu foi e fesili, ona o le tele ia o le faaletonu o lipoti lea sa i ai sa faatino e lena itu i le tele o tausaga. Ae o le agaga tonu lau Afioga i le Fofoga Fetalai, ua manaia le mea lea ua saunoa ai le sui usufono e fesili atu i o, ae o e pei o le tele lava o fesili o le latou itu ae manaia loa ae... i le taimi foi lea o le tou Tipoti Koko ona fesili uma atu lava lea i lau Afioga ma le alu o le tatou taimi i le tatou... ma faamatala a lea i ai i nai sui usufono ia e fesilisili i Lipoti ia. Pei o lau toe tulai atu lea. A o le isi foi la mea ia lea na o le tou faapea mai ua taugata le soifuaga ua taugata le soifuaga, ae ana tou lava tapena mai le tele o tausaga ia e le taitai ona tatou oo i se mea faapena. Ia o le isi foi mea lea aua o lea ua ou faalogologo atu nei faapea e toe tilotilo e faapau i lalo ia port fees ma mea faapena o le a ma le a. Ia o le taimi lena lea sa i ai la outou tapenaga sa i ai tupe ae le i oo mai i le Koviti-19. Ia ona tatou oo mai loa lea ua tatou Koviti-19 i le fia tausaga? O lea la se i toe taumafai e taumafai atu le Malo i nisi tupe e faatino ai mea o lo outou finagalo i ai ma le taugata o le soifuaga, ia o lena tou te silafia e le fai nei ona pau ai lea o le tau o le pusamoa taeao. Ae tatou onosai faatasi o lea e onosai uma lava tagata o le lalolagi i nei mea. Ae pei lava ona ou fai atu a na outou lava tapena i le fia sefulu tausaga lea ma i ai ni... e le taitai ona tatou oi faapea. Ia manuia lau Afioga i le tamaitai sui usufono.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai pe maua se avanoa faamolemole.

FOFOGA FETALAI: Ia ua i ai le manatu o le Nofoa ona o le a toso ai le tatou taimi i lenei mataupu. E i ai le manatu faapena o lea foi e tau avatu se fesoasoani a le Nofoa i lau Afioga i le Taitai o le Itu Agai atonu o lena foi ua faailoa mai le agaga o le Minisita ia, ae o lena e i ina le uta. Ae na pau lava si fesoasoani a le Nofoa leaga o la e i ai tatou Tulafono o Tupe leaga e i ai le mafuaaga na ala ai ona fai stimulus package i na taimi, lena pei ona saunoa i ai le sui usufono mamalu mai Gagaifomauga. Ne i tau toso mai la i le taugata i vaitaimi, leaga e eseese lava Tulafono a le tatou Matagaluega o Tupe. Ia se i tulai mai la lau Afioga.

Tofa Hon Lauofo Fonotoe Nuafesili Pierre Lauofo: Lau Afioga o si mea laitiiti lea e fia faasao aua o lena e saolele a lau saunoaga i mea uma ua e saunoa i ai ae leai lava se mea o sese. Ae pau a si mea lea e fia faasao i le saunoaga a le Afioga i le Minisita ona ua faapea mai e le i lava tapena lenei Itu i le la foi 5 tausaga ma Paeaiga ua tuanai. E leaga e fai si matuia tele o le tuuaiga ua aumai. Ae a matau lau Afioga lea e faafofoga Samoa i le vaiaso atoa lava lenei, o lipoti uma a ia ua maea, o lipoti a le HRPP i vaitaimi o le faamai. O le a le mea lea ua outou faafofoga mai? Tupe faasili, tupe faasili,

tupe faasili, tupe faasili. E le o i ai lava se lipoti o faapea mai ua gau se Matagaluega, pe faapea ua leai ni tupe faasili. Ia silasila la i ai i le lava tapena tele sa i ai? O le mea foi la lena ua outou faafofoga mai ai na o le faafetai, faafetai, faafetai i le Matagaluega ma le Pulega ona sa lelei tapena, lelei le puleaina o tupe ma mea uma o le atunuu sa i ai. E leai la se faamatala i tapenaga sa i ai, lelei mea uma. Ae silasila lau Afioga, o lipoti ia o lipoti ia na aumai uma lava i le faaiuga o le Paeaiaga na tea nei, ae le i i ai se taimi o le Palemene na talanoaina ai, leai ma se lipoti na tuai mai na oo uma mai lava. A o lea la faatoa maua le avanoa i le finagalo o le Afioga, faafetai foi i le Afioga i le Fofoga Fetalai, o lea ua maua le avanoa e toe lauliliuina uma ai e le Palemene lipoti nei. O le mafuaaga la lena o lipoti uma lava ia ua talanoaina, o le mafuaaga foi lena o le matou le fire atu matou le fire atu. Ia a matou toe fire atu i matou lipoti? O outou e tataua ona fire mai ae talitali atu matou ae se i tatou faatali la i le lipoti o le 2021/2022 ma le 2022/2023 a outou aua o lipoti a outou lea o le a aumai, ia ona matou fire atu loa lea. Manuia le Fono.

FOFOGA FETALAI: Se i tulai mai lau Afioga i le Minisita o Galuega.

Tofa Hon Olo Fiti Afoa Vaai: Lau Afioga i le Fofoga Fetalai o le mea tonu lava lea na ou musu ai tatou te talanoa i tua ma faaloloto tatou talanoaga i lipoti ia, leaga o lipoti ia e aumai e sao, polofiti, tele tupe faasili o fuainumera mea ia e talanoa mai ai le Taitai o le Itu Agai, ae o lea matou te iloa lelei lava le mea lea e taatia i tua. Aua na pau lava lea o le mea sa fai o le talanoa mai i fuainumera o le sese o fuainumera. O la'u toe tulai atu lena.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leaga o Matagaluega o Lipoti na tapena e le afaigaluega a le Malo e matuia la tuuaiga lea e tuuaia ai le afaigaluega le Malo. Ou te alofa tele leaga o latou o la e tautiga i le galuega. Ia malie lau Afioga, faafetai.

FOFOGA FETALAI: Lau Afioga i le Taitai o le Itu Agai, alaala mai lalo, o lea la ua faauma atu e le Fofoga Fetalai. O le a tau toso ai le tatou taimi, e tele tatou galuega ia e fai. Ua i ai le manatu faamuta ai i i lea felafolafoaiga. E talitonu foi e le o fai faafogafoga foi le atunuu i ni fetauaiga a outou o Taitai o le atunuu o lea e fia faafogafoga mai le atunuu i ni Lipoti manino. O le mea lea lau Afioga i le Taitaifono, tulai maia e saunoa mai lau Afioga i le Taitaifono.

Afioga FALEOMAVEGA TITIMAEA TAFUA: Ia malo faafetai, faafetai lava i lau Afioga i le Fofoga Fetalai le faatoatoa. Sa nofonofa lava

foi ma le fiafia e faafoliga o le a uma a lenei aso Fono o faia finauaiga, apeitai ane ia malo faafetai, faafetai le faatoatoa. O aso lava foi faapenei e iloa ai le tautai, o aso leaga ae momoli atu le faamalo ma le faafetai le lavapapale. O le a amata atu Tali e tusa o le fesili a lau Afioga i le Taitai o le Itu Agai i le mafuaaga na le faaoga ai le seleni tele lea, o lona mafuaaga o galuega faatino a le tatou Malo ua le faatinoina ona o le faamai. O le mafuaaga lena na le faaogaina ai le seleni lea lau Afioga i le Taitai o le Itu Agai.

O le Afioga ia Lupematasila ma Lautafi manaia le fesili i le tuualalo lau Afioga Lupematasila malo faafetai. O lau Susuga Lautafi sa faafesili mo le tatou price order control foi lea pe o faaauau a, ia o lea na toe lavea mai i le saunoaga a Fuaava o lena ua maua atu i ina ma le tali lau Afioga, e tai 6 masina ma fetuutuunai mai ai le tatou price control i le taimi o faalavelave faafuasei lea sa tatou i ai, o i ina na mafua mai ai ai ae mo le silafia i le taimi lenei. O se taimi o le masina lenei e maea ai ona tapena le tatou price control ona faagasolo loa laia masalo o le a faapena ona tufatufa i se taimi a o le i maea le masina lenei o Mati. O le tali lena e lavea atu ai foi ma lau Afioga Faimalo. Faafetai mo le fesili ia o lena ua tali uma atu ai a o le tele lava o faamatalaga sa tuuina mai o le faamalo lava ma le faafetai i le Komiti. E le gata i le Komiti nei ae faapea foi le Ofisa o Tupe i le Ofisa Sili o Pulega i le galuega fita o feagai ma i latou lea e momoli atu ai le faamalo ma le faafetai.

Ia o se tali atu lea e tusa ma faafesili a le mamalu o le tatou Fono Aoao faafetai.

FOFOGA FETALAI: Malo faafetai. Se i tulai mai lau Afioga i le Minisita mo se saunoaga e tusa ai ma mataupu sa laga e le Maota.

Afioga Hon LEOTA LAKI LAMOSITELE: Faamalo faafetai i lau Afioga i le Fofoga Fetalai mo le avanoa. E faamalo foi ma faafetai atu i le Afioga i le Taitaifono faapea le mamalu o le Komiti e tusa ai foi ma le auiliiliga o le Lipoti e pei ona talanoaina. E i ai foi lou talitonuga e le toe i ai se isi au faaopoopoga, e fai alofa atu foi i lau Afioga ona o le tau tilotilo atu foi i le faagasologa o le tatou fonotaga ma le taimi o loo tilotilo agai i ai ae o lea ua faamauina lava e le Matagaluega fautuaga uma o lo o aumai. Aua e pei foi ona silafia o la e faaauau lava galuega a le Matagaluega e pei ona faataatitia i lalo o fuafuaga. E momoli atu ai lau faamalo ma lau faafetai i le Tamaitai Ofisa Sili o Pulega faapea foi le Pulega ma le mamalu o le aufaigaluega, aua tasi lenei Matagaluega e tele foi luitau e feagai ma latou. O lea la e faamalosi atu ai i le tatou Matagaluega e faaauau galuega lelei o latou faatinoina i lenei taimi aua foi ua amata tapenapena tala o le tupe mo le isi tausaga fou, o la e faalogologo mai foi i fautuaga ua aumai e le mamalu o le Maota. Ou te iloa foi o le tulaga lena o lea o lo o fai pea latou tiute i

taimi uma, o le fautua mai o le Malo i le tulaga e faagasolo ai le tatou tamaoiga ma le atinaega o le tatou atunuu. O le faalatalata atu lea ma le faaaloalo i lenei itula faafetai.

FOFOGA FETALAI: Malo saunoa i lau Afioga i le Minisita. Ou te tapa lau Afioga i le Taitaifono mo le lafo.

Afioga FALEOMAVAEGA TITIMAEA TAFUA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa o le P.P.2022/2023 Nu.21, Lipoti a le Komiti o Tupe Maua ma Tupe Totogi i le P.P.2020/2021.Nu137, Lipoti Faaletausaga a le Matagaluega o Tupe mo le Tausaga Faaletupe 2019/2020.*

Faaluaina e le sui usufono mamalu mo Lefaga ma Faleaseela ma le sui usufono mo Vaisigano Nu. 1.

Na faamaonia le lafo.

FOFOGA FETALAI: Ou te tapa lau Afioga i le Sui Minisita o Tupe mo le lafo.

Afioga Hon LEOTA LAKI LAMOSITELE: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa o Tali a le Malo ma Fautuaga a le Komiti i Tupe Maua ma Tupe Totogi pei ona ou tolaulauina.*

Faaluaina e le Minisita mo le Soifua Maloloina ma le Minisita mo Leoleo ma Falepuipui, Pulega o Tinei Mu ma Faalavelave Tutupu Faafuasei.

Na faamaonia le Tali a le Malo.

P.P. 2022/2023 NU. 22, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 100 MA LE P.P.2021/2022 NU.22, LIPOTI FAALETAUSAGA A LE PULEGA O TUPE FAAVA O MALO A SAMOA MO TAUSAGA FAALETUPE 2019/2020 & 2020/2021

P.P. 2022/2023 NU.87, TALI A LE MALO I LE P.P.2022/2023 NU. 22, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU.100 MA LE P.P.2021/2022 NU.22, LIPOTI FAALETAUSAGA A LE PULEGA O TUPE

**FAAVA-O-MALO O SAMOA MO TAUSAGA FAALETUPE
2019/2020 MA LE 2020/2021.**

FOFOGA FETALAI: Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga FALEOMAVAEGA TITIMAEA TAFUA: Lau Afioga i le Fofoga Fetalai ou te faatu le lafo, *Ina ia faautagia e le Fono Aoa le Lipoti a le Komiti o Tupe Maua ma Tupe Totogi o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mamalu mo Lefaga ma Faleaseela faapea le sui usufono mamalu mo Vaisigano Nu 01.

Na faamonia le lafo.

FOFOGA FETALAI: Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Tulai mai lau Afioga i le Taitaifono.

Afioga FALEOMAVAEGA TITIMAEA TAFUA: Faafetai i lau Afioga i le Fofoga Fetalai. O le tulaga o Sailiiliga a le Komiti ma Aotelega o le Pulega o Tupe Faava-o-Malo o Samoa sa avea o se lala o le Faletupe Tutotonu o Samoa (Central Bank of Samoa) seia oo mai i le 2005 lea na faamatuueseina mai ai loa se Pulega Tumaoti i lalo o Tulafono Autu o Pulega o Tupe Faava-o-Malo o Samoa 2005.

O le Pulega o Tupe Faava-o-Malo o Samoa o lo o tuuina mai ai le Vaegatupe i tausaga taitasi e \$15 miliona e lagolago ai Tala Faatatau Autu o le Tupe a le Malo. O lenei fesoasoani mai le SIFA po o se tautua faaauau mai lava i le tausaga na faatumaoti ai i lalo o le Tulafono Autu. I le tulaga o galuega lagolago a le SIFA o lo o faaauau pea le faamatuuina atu o vaegatupe talafeagai e lagolago ai itu tau taaloga, faapea nisi o faamoemoe o lo o faatalosagaina e le tele o Nuu, Ekalesia ma Faalapotopotoga o le atunuu.

MATATIA AUSIA 2019/2020 ma le 2020/2021

Ua i ai le Polokalame faapitoa ua taua o le Front Accounting ua mafai ai e le Vaega o Tupe ona tapenaina lipoti faale-masina, faale-kuata ma le tausaga atoa i se taimi vave i le lelei atoatoa ma le faatuatuaina.

Sa faaauau galuega faalauiloa a le SIFA e tusa ai ma nafa tausii e lima (5) o lo o i Tulafono Autu o le SIFA 2005, e ui ina fetai ai le lalolagi ma luitau o

le Koviti-19. I lea tulaga ua uunaia ai le faaaogaina o upega tafailagi e faalauiloa ai auunaga a le SIFA ma fesootai ai ma paaga i tafa e fia o le Kelope.

Fautuaina e Kamupani tumaoti a le SIFA mo pisinisi -o-Malo o le (Samoa IBFC). O lenei laasaga taua o se miti ua leva ona tapena i ai le SIFA ina ia ausia lenei tulaga e siitia ai pisinisi ma tupe maua a le Ofisa e ala i le faatumaotiina o se Kamupani e patino tonu i ai nafa faalauiloa, ina ia faaitiitia ai atugaluga sa matau mai ai le Faalapotopotoga Tetele o le lalolagi i le faatinoina uma e le SIFA o galuega vaavaaiga ma galuega faamaketi sa tuuina atu le fesoasoani lautele i isi vaega o le atunuu e le masani ona fesoasoani i ai. E aofia ai le Falemai o Tamaiti i Motootua, Aoaoga, Puipuiga o Meaola, Polokalame mo le atinae o Olaga o Tupulaga Talavou o aafia ona o solitulafono, Polokalame Faaleagaga ma le Maota i Mapu i Fagalele

ITU TAUA NA FAAMAUINA E LE KOMITI

Na faamauina e le Komiti o le 2019/2020 ma le 2020/2021 ae i ai pisinisi e le i mafai ona faaauuina le toe faafouina o latou laisene pisinisi ona o ni mafuaaga tau faiga faavae ma le tausisia o tulafono. Na faamaonia e le Komiti i tulaga ua afaina ai le naunau mai o nisi o Kamupani Faava-o-Malo e faaoga le SIFA i latou pisinisi o fefaatauaiga ona o le faaiuga a le Iuni o Europa ua lisi ai Samoa i le Lisi Uliuli po o le Black List i atunuu e le talafegai ana tulafono o lafoga tau pisinisi faava o Malo ma manaoga o le EU. Ua manatu le Iuni a Europa o lo o faaoga e le aufaipisinisi atunuu laiti Small Island States ma latou tulafono e fai ma alofaga e maua ai tupe mo le totogiina ma lē totogiina ai ni lafoga.

Faamatalaga o Tupe: Aotelega o Tupe Maua ma Tupe Faaalu

I le Lipoti Faaletausaga 2019/2020 e \$29.7 miliona tupe maua a le SIFA ae \$7.1 miliona ana tupe faaalu. I le Lipoti Faaletausaga 2020/2021 na faamauina ai Tupe Maua a le SIFA e \$27.6 miliona ae \$7.3 miliona ana tupe faaalu.

Ona oo mai lea i fautuaga a le Komiti.

Fautuaga

1. E fautuaina e le Komiti le Pulega o Tupe Faava-o-Malo a Samoa, ina ia ave le faamuamua i le atinaeina o taaloga i totonu o le atunuu e pei o le Lakapi ma le Siisiiuamea mamafa, ona o le taimi nei o le tele o fesoasoani ua ave i taaloga faava-o-Malo ae faatuatuanai le atinae o taaloga i totonu o le lotoifale.

2. E fautuaina e le Komiti le Pulega o Tupe Faava-o-Malo o Samoa ina ia faanatinati le tapenaina o teuteuga talafeagai o tulafono a Samoa ina ia ogatasi ma tulafono o teugatupe faava o Malo ina ia aveese ai Samoa mai le lisi (black list) a le Iuni a Europa, ina faatupulaia ma faatumaaina ai le talitonuina e kamupani e resitala mai i tulaga faapisinis faava-o-Malo ma le SIFA ma toe iloilo le faasee atu o le SIFA e avea ma itutino o Fefaatauaiga.
3. E fautuaina e le Komiti le Pulega o Tupe Faava-o-Malo o Samoa ina ia mataiitu lelei le vave ona faatino le talosaga mai o Kamupani e fia resitala i le SIFA o le (turn-around process) aua o le matau a le Komiti, e augata foi le Kamupani e fia resitala pe a faatuatuai ona tali atu le afaigaluega i le taimi o lo o manaomia vave ai ona faatino tulaga uma tau resitala.
4. E fautuaina e le Komiti le Pulega o Tupe Faava o Malo o Samoa ina ia toe iloilo po o talafeagai le fetuunaiga o le Pulega e fua i le matau mai a Paaga Faapisinisi, ina ia avea o se auala e le mafai ai ona toe maua ni tatou Kamupani fou e resitala mai i le SIFA.

IUGAFONO

I le maea ai o iloiloga a le Komiti na faaiugafonoina ai. Fautuaina e le Fono Aoa ina ia faamaonia, *P.P.2020/2021 Nu. 100, Lipoti Faaletausaga a le Pulega o Tupe Faava-o-Malo a Samoa 2019/2020 ma le tausaga faaiiina i le aso 30 Iuni 2020 & P.P 2021/2022 Nu.24, Lipoti Faaletausaga a le Pulega o Tupe Faava o Malo 2020/2021 mo le Tausaga Faaiiina i le aso 30 Iuni 2021.*

Ma le faaaloalo lava.

FOFOGA FETALAI: Malo saunoa i lau Afioga i le Taitaifono mo le tolaulauina o Sailiiliga aemaise foi o nisi o fautuaga a la outou Komiti.

Ou te tapa lau Afioga i le Sui Minisita mo le Tali a le tatou Malo.

Afioga Hon LEOTA LAKI LAMOSITELE: Faafetai mo le avanoa lau Afioga i le Fofoga o le Fono.

E tuuina atu Tali a le Malo i le Lipoti a le Komiti o Tupe Maua ma Tupe Totogi e faatatau i le Lipoti Faaletausaga a le Pulega o Tupe Faava-o-Malo a Samoa mo le Tausaga Faaletupe 2019/2020 ma le 2020/2021.

Fautuaga 1:

E fautuaina e le Komiti le Pulega o Tupe Faavaomalo a Samoa ina ia ave le faamuamua i le atinaeina o Taaloga i totonu o le atunuu e pei o le Lakapi ma le Siisiuamea mamafa, ona o le taimi nei o le tele o

fesoasoani ua ave i taaloga faava o Malo ae faatuatunai le atinaeina o taaloga i totonu o le lotoifale.

Tali:

E ioe ma talia le Fautuaga 1 mo le lagolagoina o a tatou taaloga faalotoifale faapea autaaalo faava-o-Malo aua o se avanoa e fai ai se sao o le Pulega o Tupe Faava o Malo o Samoa i le atinaeina o Taaloga i totonu o le atunuu, ma o se avanoa taua foi lea e faalauiloa ai a tatou auaunaga tau tupe faava-o-Malo e ala i le tusia o le igoa o le Pulega i luga o toniga ma meataalo.

Fautuaga 2:

E fautuaina e le Komiti o le Pulega o Tupe Faava o Malo a Samoa ina ia faanatinati le tapenaina o teuteuga talafeagai o tulafono a Samoa ina ia ogatasi ma tulafono o teutuega faava-o-Malo, ina ia aveesea ai Samoa ma le lisi uliuli i le Iuni a Europa ina ia faatupulaia ma faatumauina ai le talitonuina e Kamupani e resitala mai i tulaga faapisinisi faava o Malo ma le SIFA ma toe iloilo le faasee atu o le SIFA e avea ma itutino o feaatauaiga.

Tali:

E talia le fautuaga. O atunuu ua tuu i luga o le lisi uliuli o le Iuni a Europa ua le tausisia ia aiaiga ua taua i lalo.

1. O le manino o faamaumauga o le faaaogaina e atunuu o tulaga aloaia faava-o-Malo e fetufaai ai faamaumauga tau lafoga ma isi atunuu.
2. Ia talafeagai le faatinoga o lafoga o lo o faatinoina e atunuu auala i le totogiina mai o a latou lafoga. O pisinisi faava-o-Malo o lo o latou ofoina atu, e aofia i lalo o lea aiaiga.
3. O le faatinoina o le taofiga o le soloieseaa o alatupe maua ma le feseetai o tupe mama e pei ona faatulaga e le Faalapotopotoga o Galuega, Felagolagomai Tau Tamaoaiga ma atinae. I le taimi nei, ua mafai ona o tatou ausia le aiaiga lona 3 a le Iuni a Europa ina ua o tatou auai i lea faamoemoe a le Faalapotopotoga o Galuega Tau Felagolagomai Tau i le Tamaoaiga ma Atinae ia Ianuari i le 2020.

O lo o faaauau pea galuega mo le faamalieina o aiaiga 1 ma le 2. O galuega e moomia ai le faatumauina o le tatou tulaga i le tausisia o vaega tetele, e ao ona usitaia mai le Faalapotopotoga o Galuega Tau Felagolagomai Tau i le Tamaoaiga ma Atinae mo le fetufaaiga o faamatalaga i luga o talosaga. E faapea foi ona taumafai e ausia lea tulaga e aofia ai le aveesea o faiga faapito sa ofoina atu mo Kamupani

faava-o-Malo, ma isi fuafuaga faapisinisi ua lesitalaina i le SIFA i lalo o ana Tulafono o Tupe faava-o-Malo.

O Teuteuga ua faia, o lo o i le tulaga o Tulafono Tau Faaofi. O lo o matou galulue faatasi ma le Ofisa o Tupe Maua ma Tiute mo fesuiaiga talafeagai e pei ona faatinoina faiga faalafoga e fua i le nofoaga o alatupe. O le a amata aloaia lea fuafuaga pe a maea ona aveesea faiga faapito o lo o i totonu o tatou Tulafono. O se fuafuaga e tatau ona faatalanoa ma le faaeteete ma le vaega o taiala, o faiga faalafoga a le Iuni o Europa ina ia mautinoa le aveesea o Samoa mai le Lisi Uliuli, ae ia faatumauina pea ana pisinisi.

Fautuaga 3:

E fautuaina e le Komiti ia le Pulega o Tupe Tau Faava-o-Malo o Samoa ina ia mataitu lelei le vave ona faatino o le talosaga mai o Kamupani e fia lesitala i le SIFA aua o le matau a le Komiti, e augata foi le Komiti e fia lesitala, pe a faatuatuanai ona tali atu le afaigaluega i le taimi o lo o manaomia vave ai ona faatino tulaga uma tau lesitala. Talia le fautuaga 3.

Tali:

O lo o iai le Faiga Faavae a le SIFA e faatino ai le lesitalaina o Kamupani i totonu o le 24 itula o se talosaga. E tatau lava ona faaleleia isi vaega o le auaunaga ina ia vave le faagasologa o le lesitalaina o Kamupani.

Fautuaga 4:

E fautuaina e le Komiti ia le Pulega, e toe iloilo pe o talafeagai le fetuunaiga o le Pulega e fua i le maitau mai o Paaga Faapisinisi ina ne i avea o se auala e le mafai ai ona toe maua ia ni tatou Kamupani fou e lesitala mai i le SIFA.

Tali:

O le tali, o le faatulagana o le SIFA o lo o iai nei ua talafeagai lea ona o le SIFA o lo o vaavaaia ma mataitu Tulafono Pisinisi faava-o-Malo mo lana Kamupani fou ua faaigoaina o le Nofoaga Tutotonu o Pisinisi Tau Tupe faava-o-Malo o Samoa, o lea o lo o puipui mai faapea le igoa, SIBFC e nafa ma le faalauiloaina o ana auaunaga tau tupe Faava-o-Malo.

O le faatulagaga o le SIFA o se Faalapotopotoga a le Malo mo Fefaatauaiga e ono avea lea ma mafuaaga e mataituina atili ai Faalapotopotoga faava-o-Malo o lo o tusia i fua faatatau faava-o-Malo ona o le faamoemoe o Faalapotopotoga a le Malo mo fefaatauaiga ina ia maua ni tupe faasili. E tulaga maualuga faafitauli e afua mai i nei ituaiga

aunaunaga faava-o-Malo i le vaai a Faalapotopotoga o lo o fausia ai fua faatatau faava-o-Malo e pei o tupe palapala, faatupeina o faigatupe o faalavelave faapea le natia o lafoga.

O le ala lea e matou te tatalo atu ai, faafoi le SIFA i le Faalapotopotoga o Aunaunaga a le Malo mo le manuia lautele.
Ma le faaaloalo.

FOFOGA FETALAI: Malo saunoa i lau afioga i le Sui Minisita o Tupe mo le tolaulauina foi o Tali manino a le tatou Malo. Ia o le avanoa leni i sui usufono mamalu o le Palemene e fia saunoa.

Tulai mai lau afioga i le Taitai o le Itu Agai.

Tofa Hon LAUOFO FONOTOE NUA FESILI PIERRE LAUOFO: Faafetai i le afioga i le Minisita ma le afioga foi i le Taitaifono mo Lipoti ae faapea foi ia Tali a le Malo ua folasia e tusa ai ma le Lipoti Faaletausaga a le Faalapotopotoga a le SIFA.

O le mea muamua e ave i ai le faamamafa a lou sui usufono e pei ona aumai i le Lipoti o Tupe Faasili \$20,656,000, Tupe Faasili \$20,656,000. O le Lipoti Faaletausaga o lo o sainia e le afioga i le Minisita, Sili Epa Tuioti. Faafetai i le Matagaluega, faafetai foi i le Pulega, faafetai mo leni Lipoti taua.

E tasi leni Faalapotopotoga o lo o fai ma fesoasoani tele i le tatou Malo i tupe maua, tupe fesoasoani mo le faagaioiina o le tatou Malo. E momoli atu ai le faafetai, e pei foi ona maitauina i le Tupe Faasili ua maua, e le o se tupe itiiti leni tupe. Faamalo le galulue, faamalo le tautua Malo.

O tatou mea o sponsor, ona e le o aumaia e le tatou Lipoti Faaletausaga se lisi foi lea o Faalapotopotoga na ave i ai le fesoasoani po o sponsor o lea ou te le o maua. Ae manaia o se fautuaga foi lea mo le agai i luma, manaia pe a faapipii mai ma se lisi foi lea aemaise lava mea o faalapotopotoga tau taaloga. Aua e pei o i lea e maitauina e agai i ai fesoasoani a le tatou Faalapotopotoga leni e atinae taaloga i totonu o le atunuu. Ia e faamalo foi i lea foi vaega.

O le tulaga foi i le Lisi Uliuli, ia o se tulaga foi lea ua tatau ona faatino i se tulaga faanatinati le fautuaga e pei ona aumai e le Komiti. Faafetai i lau afioga i le Taitaifono o le Komiti ma le fautuaga ona o lea e manaomia le toe silasila i le tatou Tax Rating po o le Tax System e pei ona aumai i le Lipoti a lau afioga i le Taitai Komiti. E taua tele le vaega lea e pei e tatau ona faatino i se taimi vave pe afai e le i faatinoina Lipoti ia i tausaga ua tuanai. Ae o le mea lea e taua tele, ona e tatau ai ona faasee ese tatou ma le Lisi Uliuli ma e le na o tatou foi se atunuu o lo o lavea ai i le vaega lea. O lo o iai foi isi atunuu o aafia, ona e pei o aiaiga ia e aumai e le Iuni a Europa lea e mafua ai. Ae e i ai le talitonuga o lo o sologa lelei ia mea uma.

Ia lau afioga i le Fofoga Fetalai, o tulaga ia e pei e avatu ai se fautuaga ona o mea ia e manaomia ona fai faanatinati aua se siitia o le tulaga lelei e oo i ai i ai le tatou Faalapotopotoga lea, aua e manaomia le Tulafono, Tulafono Tau Faaofi. Ia o le mea lea e tatalo atu ai, o la foi e faafofoga mai le Ofisa o le Loia Sili afai o Tulafono ia e manaomia le aumai, ia ma nisi Tulafono, ia ua tataua ona vave aumai i totonu o le tatou Maota, ona o i lea e faalagolago ai nisi foi o tupe maua, mo le atinaeina o le tatou Malo ma le atunuu.

Ae faafetai mo le avanoa lau afioga i le Fofoga Fetalai.

FOFOGA FETALAI: Malo saunua i lau afioga i le Taitai o le Itu Agai.

Afioga Fepuleai Faasavalu Faimata Sua (Salega 1): Lau afioga pe maua se avanoa...

FOFOGA FETALAI: Ia tulai mai le sui usufono mo Salega 1.

Afioga FEPULEAI FAASAVALU FAIMATA SUA (Salega 1): Faafetai mo le avanoa i lau afioga i le Fofoga Fetalai, ua faitau atu foi ma le manino i le Lipoti a le Afioga i le Taitaifono, e tele lenei galuega e tau faamaopopo tupe. E agai lava lau faafesili i le afioga i le Taitaifono po o le afioga foi i le Minisita i tulaga tau seleni.

O lea ou te faitau atu i le Fautuaga lona 2, fai mai le Fautuaga lona 2 i se vaega lea o le a ou lauina, “Ia ogatasi Tulafono o Teugatupe faava-o-Malo ina ia aveesea ai Samoa mai i le lisi, o le Black List po o le Lisi Uliuli a le Iuni a Europa ina ia faatupulaia le faatumauina ai o le talitonuina e Kamupani e lesitala mai.”

O lau fesili lau afioga i le Taitaifono, pe mafai ona aumai se faamalamalamaga pe o le a le mea ua tatou maka uliuli ai i lea vaega? O lea na saunua nei le sui usufono e \$20 miliona le Tupe Mama. E le taulia ia te au le tele o le Tupe Mama. Ae a le talitonuina se atunuu e se isi atunuu o le lalolagi, e foliga mai e le o sao le mea la e fai. O lona uiga i lou talitonuga o lenei usugafono, e foliga mai e palapala tatou mea ia e lau i fafo. E le o amiotonu le faiga o tatou faiga faavae ia po o aiaiga foi. E le matagofie le tauleleia o se atunuu i nisi vaega, ae le talitonuina i mea tau tupe. Po o le a le lelei o se Pulega, e tele atinae, tele mea lelei e fai. E oo foi i le Malo ma Faalapotopotoga i tua, ae a le talitonuina loa tupe, e tele lava se aafiaga. E ala la ona ou faafesili lau afioga i le Taitaifono ma le Minisita, aumai i luma se faamalamalamaga o le mafuaaga ua ala ai ona oo tatou i le Lisi Uliuli.

O le Fautuaga lona 2, ina ia mataitu lelei le vave ona faatino o talosaga a Kamupani. O lou popolega lea e i ai, ne i avea le Fautuaga lona 4 i le fesuaiga o le Pulega, ma afaina o le tuai ai o le faatinoina o galuega. E pei

o le tulaga lena o lea e tau avatu ai se tuualalo, ina ia faamalamalama mai le vaega lea.

O le Tali a le Malo i le vaega lona 2, aiaiga muamua ma le 2, ae lea e na o le 1 le aiaiga lona 3 lea e tau amata ona oo i ai. E foliga mai na faiseese lava nai a tatou mea i fafo. O lea foi e maitau i saunoaga o ni faiga faavae ia po o ni maliega. Ia afai ua fai mai fafo ia fai atu ia ni tatou maliega lelei, e lelei le faapaleni o itu e 2, aua a tatou le usitai foi i fafo, ia e le maua mai fesoasoani tau tupe. Ae a tatou ui loa i le faamalama e tatou te monomono ni mea foi ia pe le amiotonu, ia na foliga mai lea e palapala a tatou tupe ia e i ai. Ae afai e tatou te o i le Lisi Uliuli lea e aumai, o le a le uiga o le \$20 miliona ae palapala le \$20 miliona? Ia ona foliga mai lea o ni tupe foi lea fai mai le isi tamaloa sa i le Palemene foi, po o ni tupe eleelea. Ae lelei le faamalamalama mai, pe o ni tupe mama a tatou \$20 miliona lea e polofiti pe o se tupe ua uma ona faamama.

O le toe tatalo atu lea, aumai ni tatou polofiti foi lea la e mama, ae aua le aumai ni polofiti o la e iloa e palapala. Ia o se fesoasoani atu lea lau afioga i le Taitaifono.

FOFOGA FETALAI: Ia masalo o se taimi saunoa le Taitaifono ma le Minisita, se i tulai mai lau afioga i le sui usufono o le Komiti.

Afioga ALIIMALEMANU MOTI MOMOEMAUSU ALOFA TUUAU): Ia faafetai i lau afioga i le Fofoga Fetalai mo le avanoa. E uma saunoa atu le matou Taitaifono e tali atu i nisi o fesili, ae o le saunoaga a le Itu Salega, ona ua matuia ia saunoaga ia na fai nei i Tupe Palapala. E leai e le o ni Tupe Palapala, o le auga lava ia o ituaiga pisinisi ia, International Trade Funding ia, e laisene mai Kamupani mai fafo i inei i totonu o le tatou atunuu lea e maua ai a tatou tupe. A o Kamupani lava ia e nonofo i fafo i atunuu la e i fafo.

O lea na e taua, po o le a le mea ua ala ai ona iai vaega e 3 ia ona tatou lavea... lea na ala ai ona aafia Samoa i lalo o le Lisi Uliuli. A lona tali na e i lalo ifo, tali ifo i lalo ifo o le Fautuaga lona 2, na e tali manino ai lava le Minisita i aiaiga e 3 na ala ai ona tatou lavea i le Lisi Uliuli.

O lea la ua maea le aiaiga muamua. O mea na ala ai ona tatou i totonu o le Lisi Uliuli mo aiaiga mo Tulafono po o requirements, International e tatau ona tatou ausia, standard requirements.

FOFOGA FETALAI: Ia, faafetai o lea ua maua atu...

Afioga ALIIMALEMANU MOTI MOMOEMAUSU ALOFA TUUAU: E toe la o le vaega lona 2, lea e le i...

FOFOGA FETALAI: Faafetai o lea ua maua atu le finagalo o le sui usufono mamalu o le Komiti. O lea ua maua lou finagalo atonu o lea ua vave tali foi ia le sui o le Komiti ina ia vave manino le... ia le lauga foi a le sui usufono o Salega Nu.1.

Ia ae ou te faamalulu i le sui usufono mamalu, ia atonu o se taimi ona saunoa manino lea o le Taitaifono a la outou Komiti ia faapea foi le Minisita, ia ona faaatoatoa lea o le... ae o lena ua aumai sina faaata, mo le silafia e le sui usufono mamalu mai Salega Nu.1.

Ae faafetai mo le fesoasoani mai se i faagasolo ia le tatou galuega, ia ona le uma ai lava lea o le tatou fesoasoania'i. Ia o lea ua maitau atu ua leai se isi, ia tulai mai lau afioga i le Taitaifono.

Afioga Auuapaau Mulipola Aloitafula Mulipola (Aiga i le Tai): Lau afioga i le Fofoga Fetalai....

FOFOGA FETALAI: Ia onosai mai lava lau afioga i le Taitaifono se i tuu atu le avanoa i le sui usufono mo Aiga i le Tai.

Afioga AUUAPAAU MULIPOLA ALOITAFUA MULIPOLA: Ia, e momoli le faamalo i lau afioga i le Taitaifono. E manatu foi o lea e maua atu e lenei usugafono o Lipoti lava nei e tusa ai foi o faigamalo ua mavae atu. Ae i le Fautuaga lona 2 lau afioga i le Fofoga Fetalai, masalo o le tulaga foi lea na ou fesiligia ai le Lipoti a le isi Komiti ananafi. O le vaega lava lea e taua mai e faapea, ina ia faanatinati le tapenaina o teuteuga talafeagai o Tulafono a Samoa.

E pei foi lea e maua atu e lou sui usufono, a tupu loa se mea i le Matagaluega, faatoa apata loa lea e fai faiga faavae e tapena se Tulafono Tau Faaofi. I se isi faaupuga tulou le Maota, ua muamua ta le aufai ae mulimuli faanoi. Pe a fua lava i le faamamafa o upu ia e aumai i luma i i. A o le agaga faafetai i le Taitaifono ma le Minisita o lea e tali mai, ae afai o tulaga ia ua oo i ai ona o le lona 2 lea o Lipoti lea ou te tapa pea le faatauaina o le aumai i luma o upu o Lipoti nei. O lea foi la ua lavea i i le Lipoti lea a lau afioga i le Taitaifono, e pei e foliga mai seiloga e tupu se mea, faatoa apata lea i le process e faatino ai le tulaga o le mea lea.

O lea la ou te fesiligia, pe o le a le auala na faanatinati ai la ona fai le SIFA lea ae le i uia auala talafeagai, o lea la ua alualu ua tupu le faafitauli pei o lea ou te tau matau atu, ona e tatou te le o ausia tulaga tau le totogiina o lafoga. Ae mafua mai la, ona o le le tapenaina o le process, ina ia faau mai i totonu o se Tulafono Tau Faaofi i totonu o le Maota nei. E fia maua ai se atoaga o le sui usufono lenei ma le agaga faaaloalo, faafetai.

Afioga Masinalupe Makesi Masinalupe: Lau afioga i le Fofoga Fetalai...

FOFOGA FETALAI: Ia, e te lavea i le Komiti pe...

Afioga Masinalupe Makesi Masinalupe: E Komiti lau afioga ae fia piipiiama atu i le saunoaga a le sui o le matou... ia ae le i avatua se tali a le...

FOFOGA FETALAI: Lau afioga i le sui usufono mamalu o le Komiti, o lea o le a tau tuu atu le avanoa i le Taitaifono, ia maua foi le avanoa mo le tou Komiti pe a faapea... ia ona o lea e tou te i totonu o le Komiti, o le mafuaaga lena o lea ua...

Afioga Masinalupe Makesi Masinalupe: Ia lau afioga, e leai se loto e faia, ae fia faamalamalama lava le tulaga lea leaga e pei e tiga foi i le matou Komiti le tulaga lea e aumai... ae o lea sa matou sailiili lelei lava i tulaga uma e pei ona i ai le SIFA. Ma le faaaloalo lava.

FOFOGA FETALAI: Ia atonu e i ai se taimi lau afioga i le sui usufono mamalu.

Tulai mai lau afioga i le Taitaifono ona aumai ai lea o lau faataga i sui o lau Komiti e tolaulauina foi le Tali a la outou Komiti.

Afioga FALEOMAVAEGA TITIMAEA TAFUA: Malo faafetai. E momoli atu le faamalo ma le faafetai tele. Ia e le tele lava ni fesili. O le tuualalo ma le faamalo a le Afioga i le Taitai o le Itu Agai, e tusa o le lelei ona pulea ma faatino le tatou SIFA. E le gata i vaega eseese uma i latou fesoasoani i tulaga tau taaloga faava-o-Malo ia faapea foi ma totonu o si o tatou atunuu. Ia malo faafetai.

E na o le fesili a Salega 1 e tusa o le... e na ona toe pai atu lava i le tulaga lea, e lavapapale lau afioga ma tau onosai, e leai se mea faapena o tulai mai. O lo o sologa lelei mea uma. A silasila totoa lau afioga i tulaga o pisinisi faapenei, e i ai lona feeseeseaiga.

O le tulaga lea o le Faalapotopotoga lea o le SIFA, e pei ona e taua o tupe palapala, masalo mo lou silafia, e le na o Samoa o l o i ai i totonu o le lisi lea. E mautinoa lelei, e i ai lava nai vaega e ono faatamala ai le siakiina o tatou... e le tatou aufaigaluega. Ae i lena tulaga, e i ai foi le avanoa e toe autilo ai i ai, ia ma toe faasao ia ma faamama. Masalo o le taimi nei o lea ua faasolosolo ina faaauau pea feutagaiga i masina ua tuanai e toe iloilo ai Samoa ia ma taumafai e aveese mai i le lisi lea mo le silafia e lau afioga e tusa o lau fesili. Ia ou te lagona, e leai se tulaga o faapopoleina ai.

Ua saunoa foi lau afioga i le Sui Fofoga Fetalai, ia e saolele lava ia lau saunoaga. Ae mo le silafia, o le tasi lenei o vaega o lo o faapena ona fesoasoani malosi i le atinae o si o tatou atunuu le tatou SIFA. E le gata i le tele o galuega fai a si o tatou atunuu, ae o le atinae o le tulaga tau taaloga. Ia e momoli atu ai le faamalo ma le faafetai.

E talitonu foi, e ioe ma talitonu i le paia lasilasi o le tatou Maota Fono nei vaeatu le ee mai o lau afioga i le Fofoga Fetalai, o lo o sologa lelei mea uma. E pei o le tali atu lea e uiga i Tupe Palapala. O lo o lesitalaina le tatou Kamupani o le SIFA e tusa ai ma Tulafono ua maea ona pasia e le tatou Palemene ona o lo o... ma taitaiina ai le SIFA. Lau afioga, ua maea ona lesitalaina ma pasia e le tatou Palemene tulaga uma e pei ona faafesiligia. Ae ioe ma talitonu, e tatou te le fesiligia le fesoasoani a le SIFA o lena ua outou silafia i le atinae o si o tatou atunuu. O lea e momoli atu ai le faamalo ma le faafetai tele, e tusa ai i e foi na fesiligia ma fia malamalama i vaega taitasi uma e pei ona ou taua.

Ia o le tali atu lea ma le agaga faaaloalo i lau afioga. E talitonu foi ua faamalieina a tatou fesili.

FOFOGA FETALAI: Malo, faafetai.

Tofa Hon Laufo Fonotoe Nuafesili Pierre Laufo: Lau afioga i le Fofoga Fetalai...

FOFOGA FETALAI: Sei tulai mai.

Tofa Hon Laufo Fonotoe Nuafesili Pierre Laufo: Leai o se... o le mataupu lea ona o au lea sa lauga i le mataupu lea ae ou te fia agai atu i o i le afioga i le Taitai...

FOFOGA FETALAI: E le o faamalieina lou finagalo i le tali a le Taitaifono.

Tofa Hon Laufo Fonotoe Nuafesili Pierre Laufo: E i ai se vaega lea e le i oo i ai lana saunoaga e tusa ai ma le mea lea sa ou talanoa ai...

FOFOGA FETALAI: Ia se i saunoa mai...

Tofa Hon Laufo Fonotoe Nuafesili Pierre Laufo: Ae afai ua leai, ia o le a ou nofo i lalo.

FOFOGA FETALAI: Ia o le uiga lena, aua o lena e te faafofoga atu i le tali a le Taitaifono, o la ua faamau mea uma e pei ona outou saunoa i ai ia ma vaavaai mo le agai i le lumanai.

Tofa Hon Lauofo Fonotoe Nuafesili Pierre Lauofo: Leai e pau lava si vaega lea na fia oo atu i ai se tala, mo mea o pisinisi nei faava-o-Malo, International Companies. E tele la ina aafia tatou i aiaiga ma Tulafono foi a isi atunuu aemaise la i i le Iuni a Europa lea e i ai aiaiga ia. A oo la ina fetuunai ma fesui ai a latou Tulafono ma Faiga Faavae ma Aiaiga, e tatau foi la ona faapena tatou iinei, ina ia faaauau le Pisinisi, e maua ai tatou tupe ia aua le atinaeina o le atunuu. Ia faapena foi la ona fetuunai atu.

Afai la e sui faafuasei mai o, ia e tatau foi la ona align atu tatou ia fetau ma o. E pei o le mea lea lau afioga i le Fofoga Fetalai. Faafetai. Manuia le iuga o le Fono.

FOFOGA FETALAI: Ia malo saunoa, ia se i tulai mai... e i ai se?... lau afioga i le sui o le Komiti. Pe i ai se mea o e fia saunoa i ai e ese mai i le saunoaga a le Taitaifono?

Afioga Masinalupe Makesi Masinalupe: Leai, lau afioga e pau lava o lea, e manaia le fesili. Ua malamalama tele ai foi le tulaga e pei ona i ai. A o lea ua saunoa sao lava le Taitai o le Itu Agai i le manatu foi sa tau avatu, ona e eseese Tulafono a tatou i mea tau lafoga ia ma fafo. E pei o le tulaga na o lea e mafua ai ona feseetai, o lea la e 2 na talia, ae toe tasi le tatou Tulafono lea ua faamaea.

FOFOGA FETALAI: Ia o lea ua manino lea vaega, atonu o lea foi e faafogafoga mai le sui usufono sa laga lenei mataupu, ia o lea ua manino saunoaga a sui o le Komiti, ia aemaise foi o le fesoasoani a le Taitai o le Itu Agai.

Ia se i tulai mai lau afioga i le Minisita. Pe i ai se isi faalautele po o ua lava ma totoe.

Afioga LEOTA LAKI LAMOSITELE: Faafetai mo le avanoa, e le tele se faalautele tele atu o lea ua foliga mai ua manaia foi le faamaninoga o le mataupu e uiga lava la i le... masalo o le isi luitau mo tatou o le faaliliuina o upu. Ia a e faitau i le faa-Peretania, e mama lava le aumaiga o le maitaupu. A faaliliu loa la i le faa-Samoa, ia o lea la ua mafua ai ia le tatou feteenaiga faapenei. O se mea foi e ao ona silasila ai i latou o lo o faatinoina lea galuega.

A ua faamauina ia finagalo e pei foi o le faamatalaga lea ua aumai, e... ona o tatou foi lea ua o tatou oo i luga o fefaatauaiga faava-o-Malo, ua amata ona taumatemate mai le tulaga lea. E sui mai loa la Tulafono a le isi vaega,

ia ona maua loa lea o tatou ua tataua ona vave foi le tatou tali atu i ai, ina ia mafai ona faaauau ai le vaega lea. Ae i lau tilotilo atu i ai, o le SIFA o se Kamupani o lea ua uma ona lesitala faale-Tulafono ma o lo o faapea lava ona faaogaina a latou galuega e limataitaiina i lalo o le Tulafono e pei ona i ai. O lea la ua aumai ia le latou Lipoti, ia o mataupu ia sa tagofia e le Komiti, o mataupu aoga ma o mataupu e mafai ai foi ona toe fagufagu atu i le tatou Ofisa o le SIFA i le mataituina o luitau ia ua amata ona tulai mai foi i lenei vaitau.

E momoli atu ai le faamalo ma le faafetai i le Komiti Faatonu aemaise foi le Pulega e tusa ai foi ma le latou taumafaiga mai o le latou foi pitolaau ia aua le fesoasoani ma le atinaega o le tatou atunuu. Faamalo faafetai lava.

FOFOGA FETALAI: Malo saunoa i lau afioga i le Minisita. Se i tulai mai lau afioga i le Taitaifono mo le lafo.

Afioga Fepuleai Faasavalu Faimata Su'a: Lau afioga pe maua se avanoa lau Afioga i le Fofoga Fetalai?

FOFOGA FETALAI: Ou te faamalulu atu i le sui usufono mo Salega, ua uma ona saunoa le Minisita ma le Taitaifono.

Afioga FALEOMAVAEGA TITIMAEA TAFUA: Lau afioga i le Fofoga Fetalai ou te faatu le lafo, *Ina ia faamaonia e le Fono Aoaio le P.P. 2022/2023 Nu.22, Lipoti a le Komiti o Tupe Maua ma Tupe Totogi i le P.P. 2020/2021 Nu.100, ma le P.P. 2021/2022 Nu.22, Lipoti Faaletausaga a le Pulega o Tupe Faava o Malo a Samoa mo Tausaga Faaletupe 2019/2020 & 2020/2021.*

Ma le faaaloalo lava.

Faaluaina e le sui usufono mamalu mo Vaisigano Nu.1 ma le sui usufono mo Lefaga ma Faleaseela.

Na faamaonia le lafo.

FOFOGA FETALAI: Tulai mai lau afioga i le Minisita mo le lafo i le Tali a le tatou Malo.

Afioga Hon LEOTA LAKI LAMOSITELE: Lau afioga i le Fofoga Fetalai ou te faatu le lafo, *Ina ia faamaonia e le Fono Aoaio Tali a le Malo i Fautuaga a le Komiti o Tupe Maua ma Tupe Totogi, e pei ona ou tolaulauina.*

Faaluaina e le Minisita o le Soifua Maloloina ma le Minisita mo Leoleo ma Falepuipui, Pulega o Tinei Mu ma Faalavelave Tutupu Faafuasei.

Na faamaonia le Tali a le Malo.

FOFOGA FETALAI: Ia malo faafetai i le paia o le tatou Maota ua o tatou oo tonu mai lava i le taimi ua tataua ona tatou malolo ai. O le mea lea, malo le usufono, o lea ua o tatou taunuu mai i le tatou taimi manava o le Aso Faraile, ona e i ai nisi o le tatou Maota e tuatuagia ma faimalaga foi i afioaga, ia aemaise foi o fuafuaga o le faaiuga o lenei vaiaso, aemaise o tapenaga mo le Sapati o le Alii.

Ae momoli atu le faafetai i le paia o le Palemene mo lo outou onosai ma le faamalolosi mai mo le taumafaiga o le tatou galuega i lenei vaiaso. Sa i ai lava le naunautaiga e fia faamaea ia le tatou galuega i lenei vaiaso, peitai ua le talafeagai. Ua molimauina lava le saausi o saunoaga, aemaise foi ua ou matau atu ua faaosofia lava finagalo o le tatou Maota e sufi le taua o iloiloga sa tautiga ai tatou Komiti Faa-Palemene. E tele foi mataupu taua ua faapunafanau mai le faagasologa o le tatou galuega lenei, e aoga tele mo le Kapeneta ma le latou foi pitolaau. E tatou te malamalama uma lava e le i faatumutumulima galuega sa fitaituga i ai tatou Komiti, aemaise foi e tele tupe sa faaalu i galuega a Komiti Faa-Palemene taitasi. O le mafuaaga lea e tataua ai lava ona tagofia uma tatou Lipoti a Komiti ma Tali a le tatou Malo ua faatulaga mo le fonotaga lenei.

Ona i ai lea o le manatu, o le a faaauau le tatou galuega i le vaiaso fou mo le faamaeaina o tatou Lipoti ma Tali a le Malo o lo o totoe. Ae ua faamalo faafetai le usufono i lenei aso. Ia, pe a tatou taape, ia agalelei le Alii i nisi o feau faatali mai. Faafetai atu foi Samoa i lau tapuaiga o lea ua iu ma le manuia le galuega a lau Palemene i lenei vaiaso ona o lau tapuaiga. Faamalo faafetai. Ia i ai pea le filemu o le Atua i si o tatou atunuu ma ia i ai ana faamanuia i le alo atu i faiga malologa o le faaiuga o lenei vaiaso.

Faamalo faafetai i le tapuaiga a Ofisa Sili o Matagaluega ma Faalapotopotoga Tumaoti a lo tatou Malo, e tele nisi galuega o feagai ai ma lo outou valaauina. Peitai, o lo o taumafai lava e faaavanoa mai ona o taualumaga faaauau a le tatou Palemene. Faamanuia le Atua i lo outou valaauina.

Ae tatou te le i tolopo ou te talosaga atu i le sui usufono tamaitai mo Aleipata Itupa i Lalo se i e saunia se tatou tatalo.

Na tolopo Tualumaga a le Fono Aoao Faitulafono i le itula e 12:06 i le aoauli seia aulia le Aso Gafua, 13 Mati 2023 i le itula e 9:30 i le taeao.